

WAN

NIUSPEPA BILONG YUMI OL PAPUA NIUGINI STRET! 27 YIA NAU

32 pes Namba 1,289 Wik i stat long Fonde Mas 11, 1999 60t

INSAIT		• Tokpilai wantaim Kanage - pes 25 na 26	• Witnes tok ol kukim vot bilong Peter Yama. - pes 2	• Adam dai long Angau haus sik - pes 3	
	Lukim 4 pes ekstra spot long insait				

Ol bai ileksen long Hailans bungim hevi

PETER MAIME i raitim

BAI i nogat vot long Simbu na Kagua Erave bai ileksen sapos ol plis i no was long ol ileksen opisals.

Dispela strongpela toktok i bin kam long tupela man husat i go pas long ileksen long dispela tupela ilektoret, Abraham Wari long Simbu na Alphonse Yapen long Kagua/Erave.

Ileksen bai stat long dispela Sarere tasol ol plis i nogat mani long lukautim ol dispela ileksen.


Wanpela Provinsal Plis Komanda i tok, em i no save ol bai mekim wanem bikos vot bai stat long Sarere na ol i no gat mani long lukautim ol ileksen.

Taim *Wantok* i bin askim Hailans Plis Divisenal Komanda, Mathew Minok, em i no laik toktok planti long dispela samting. Tasol em i tok, "ileksen i kamap gut o nogut em i wari bilong ilektoret Komisina na i no plis."

Mista Minok i bin askim *Wantok* long sekim long opis bilong Plis Komisina Peter Aigilo na Sief ilektoret Komisina, Rueben Kaiulo.

Taim *Wantok* i ringim Mista Agilo aste, em i no bin stap long opis bilong em. Mista Kaiulo, ol lain long opis bilong em i tok, em i bin go long wanpela bikpela miting.

I go moa long pes 2



Namba wan spika long Kabwum... • (Iphan) Morobe Gavana Luther Wenge i sikan long palamen spika John Pundari long Kabwum distrik las wiken. Pundari em namba wan spika long go long Kabwum long opim sampela projek. (name) Helt Minista Ludger Mond na Finsafen memba Alfred Pogo tu i stap wantaim long dispela de.

PNG gat rekot long bagarapim meri

REKOT bilong Papua Niugini i no gutpela wantaim ripot olsem em i kamap namba tu long wol long asua bilong bagarapim meri.

Dispela i bihainim wanpela stadi we Yunaitet Nesens i bin wokim na Elizabeth Reid, meri i makim sia bilong Yunaitet Nesens Developmen program long PNG. Elizabeth Reid i bin i bin tok long dispela wik insait long selebresen we ol meri grup long Mosbi i bin holim long makim Intenesenel Wimens De long dispela wik Mande.

Bagarapim ol meri i kamap long ol rot olsem paitim meri na bagarapim meri we long Tok Inglis ol i kolim long reip.

Em i tok sampela long ol dispela pasin bilong paitim meri, wokim nabaut long ol meri na i no givim gutpela sapot long ol meri long wokples na reip em ol i save ripotim tasol sampela tu ol i no save ripotim. Het tok long dispela de long PNG em "Jastis na Pis" na long wol em "Wol Fri ov Vailens".

Mis Reid i tok stat long 1975 taim ol i luksave long Mas 8 long olgeta yia olsem Intenesenel Wimen's De, ol i wok long laik kisim luksave na mekim ol samting bilong rausim ol pasin nogut o birua egens long ol meri.

Em i tok rekot bilong paitim na bagarapim ol meri i bikpela long PNG, winim ol rekot bilong dai long ol arapela birua olsem ol mama i dai long karim pikinini, ol eksiden na ol arapela sik moa. Na bikpela mak long ol meri we i save bungim hevi na bagarapim em ol yangpela meri i gat 15 krismas.

Plantim meri tru i save dai taim ol i karim pikinini na rekot i soim olsem PNG i gat nogut rekot tru long wol.

355ml Enjoy Coca-Cola

K1.00

Everywhere

355ml Can
K1.00 tasol

Don't pay any more!
Recommended Retail Price

COCA-COLA AND THE CONTAINER BOTTLE DESIGN ARE REGISTERED TRADEMARKS OF COCA-COLA COMPANY

Dai bilong Adam long Angau haus sik

JOE KANEKANE i raitim

Planti bilong mipela i save tingting olsem taim mipela i go long haus sik em bai sik bilong mipela i pinis na bai yumi no inap bungim indai. Tasol Emily Joe i no ting olsem. Em i pret nau long kisim ol pikinini bilong em i go long ol haus sik. Long wanem em i lusim pikinini man, Adam long Angau haus sik, na bilip bilong em i lus pinis long ol haus sik. Em i traim hat long lusim ting ting long dispela nait we manki bilong em Adam i bin lusim laip bilong em, long wanem em i bin dai long ai bilong ol nes.

Dispela em stori bilong em long dispela nait taim em i lusim Adam. Liklik manki Adam i bin komplek olsem bel bilong em i pen na skin bilong em i hot. Dispela em long namba 2 de long mun Oktoba, 1998, wanpela Fraide nait.

Mi wasim na putim wara long het bilong em tasol sik i no pinis olsem na mi askim wanpela wantok husast i karim mitupela i go long Angau hausik long kar bilong em.

Taim mipela kamap long hap, sikiriti tokim mipela long wet ausait long we ol aut pesen i save sindaun. Mipela i kamap long hausik long hap pas 8. Mipela wet i go inap 10 kilok taim ol nes i senisim rosta bilong ol. Mitupela wet klostu long tupela aua na mi les pinis. Mi kirap i go askim sikiriti long wanem as na mipela i weit longpela taim na i nogat wokman i kam na lukim mipela hariap.

Em i tok olsem i gat tupela nes tasol i bin wok long dispela nait na tupela i wok long dresim sua bilong wanpela man husait i bin kisim bagarap long het bilong em. Na tu i gat sampela ol sikman husait i bin kam pastaim long mipela olsem na mipela i mas wet inap ol i kisim marasin pastaim long mipela.

Taim mi go bek long Adam, sik bilong em i go bikpela olgeta. Em painim hat long slip na em wok long tanim tanim na kra i stap. Mi karim em na abrusim sikriti na go insait long ples we ol nes i wok i stap. Taim mi kamap long wot, mi bungim wanpela nes husat i bin wok i stap.

Em i askim mi long tokim em wanem samting i wok long rong long manki. Mi stori gut tru long olgeta samting i kamap long manki, mi bilip olsem sapos mi stori gut long nes bai em i ken hariap na givim marasin long Adam. Tasol, em i tokim mi long putim wara long het bilong Adam na larim em i silip long bet. Mi bihainim toktok bilong em long wanem mi bilip olsem wanem samting em tokim mi bai halivim manki, long wanem skin bilong em i hat nogut tru.

Bihain liklik mi pilim olsem skin bilong Adam i kamap kol. Mi kirap nogut tru long wanem liklik taim

tasol mi putim wara long skin bilong manki na hariap tru, na bodi bilong em i kamap kol.

Wanpela nesing sista i tokim narapela nes long ring na toksave long dokta olsem em i mas kam kwik taim long lukim Adam.

Dispela sista i supim wanpela gumi i go long nus bilong Adam na putim sampela wara i go insait long manki. Em i traim ol narapela samting tu long manki long wanem sik bilong em i go bagarap olgeta.

Mipela wet na wet long dokta long kam, tasol i nogat sain liklik. Nes i go traim gen tasol, dokta i no kam yet.

Mi lukim Adam na lewa bilong mi bruk stret. Em i tromoi lek, tanim ta nim, kra i, holim pas mi na mi tu holim em! Mi wok long pilim strong bilong manki i wok long go daun isi isi. Em wok long kisim win hariap, hariap tru. Em kus na tanim tanim gen. Sik i wok long

winim em, tasol dokta i no bin kam long dispela taim.

Mi lukluk i stap taim olgeta strong, win na laip bilong manki i wok long lusim em isi isi. I no long taim manki i no mekim nois moa long bet na mi save olsem Adam i dai pinis. Mi lukluk raun long ol sik manmeri na ol sista tasol i nogat wanpela bilong ol i gat bekim long dispela askim bilong mi olsem bilong wanem na manki Adam i dai long han bilong mi. Mi karamapim em na kra i long mi yet, aiwara i ron long laik bilong em.

I no long taim nau na dokta i kam. Em apim bet sit lukim pes bilong manki husat i dai pinis, bihain em putim bet sit i go bek na em i go. Em i no wokim wanpela toktok long mi.

Emily i toktok pinis wantaim wanpela ol loya bilong em long kotim Angau hausik. Harriknen loyas bilong Mosbi bai go pas long dispela kot.

Skate tok em i yusim K38,490 long baset

YAKAM KELO i raitim

PRAIM Minista Bill Skate i tok em i bin tromoi olsem K38,390.47 long raun bilong em i go long Kavieng, Namatanai na Kimbe long las mun. Na dispela mani i stap long baset.

Mista Skate i tok antap long dispela em, K181,000 we i stap long baset na em i bin putim K6,000 olsem diskresen fan bilong em

Praim Minista i mekim dispela tok tok long bekim askim bilong Oposisen long las wik we i tok raun bilong Praim Minista long holiide bilong em i bin yusim klostu K200,000 long haiarim balus na givim mani i go aut long ol manmeri bilong Nu Allan na Kimbe.

Oposisen i tok kantri i sot long mani tasol gavman i kisim mani we na i wok long givim nabaut na baim balus raun. Tasol Praim Minista Bill Skate i tok em i no amamas long harim dispela toktok bilong ekting Oposisen lida Chris Haiveta long giamanin ol pipel olsem takis mani bilong ol em Praim Minista i wok long tromoi nabaut.

Mista Skate i tok em bai mekim moa raun i go long olgeta provins we ol Praim Minista na Deputi Praim Minista long bipo i no save mekim. Ol i save laik go tasol long Paris na Nu Yok long mun Jun. Mi laik i go long Hagen o Alotau o Manus o ol arpaela ples, taun na siti insait long Papua Niugini, Mista Skate i tok.

Mista Skate i tok taim em i go raun na bungim ol manmeri bilong ples, em i kisim klia tingting long wanem samting em gavman i mas mekim. Long Waigani em ples we mani i save kam long en, tasol long ol ples na taun insait long PNG em ol hap we yumi ken painim aut ol rot bilong mani i go long en, Praim Minista i tok.

Mista Skate i tok ol pipel i makim ol lida long makim ol long palamen na long makim ol pipel gut em long go bek na stap klostu wantaim ol long painimaut wanem samting ol i sot long en. Olsem Praim Minista dispela pasin em bikpela samting long mekim, em i tok. Bihain long Mista Skate i bin kam bek long raun bilong em i go long Rigo long Sentrel provins, em i tokaut olsem dispela yia em yia bilong Praim Minista long raun long ol provins we ol arapela Praim Minista long bipo i no save mekim.

Tasol Oposisen i bin tokaut las wok olsem taim Praim Minista i bin stap long holiide bilong em, em i wok long mekim samting we em ino ken mekim. Em i makim pinis ekting Praim Minista lairo Lasaro long lukautim kantri taim em i stap long holiide. Tasol Oposisen i askim bilong wanem na Mista Skate i tok long givim mani long ol wok na ol samting we em i wok bilong ekting Praim Minista long mekim. Oposisen i tok dispela em namba wan taim tru wanpela Praim Minista bilong kantri i mekim pasin olsem we em i makim man bilong mekim wok tasol em yet i go het na mekim samting.

Gutpela pasin bilong PNG i bagarap, Narokobi i tok

GUTPELA pasin ol pipel bilong Papua Niugini i save bihainim bipo i wok long bagarap nau. PNG nau i stap hap we long rot nogut bilong bagarap we gutpela fridom na demokresi i wok long bagarap, lida bilong Oposisen Bernard Narokobi i tokaut long dispela bihain long em i bin skelim pasin bilong PNG wantaim wanpela kantri long Afrika ol i kolim Naijeria long las wik.

Mista Narokobi i bin go long Naijeria olsem wanpela mausman insait long Yunaitet Nesen tim bilong skelim na glasim ileksen bilong Naijeria long las wik.

Mista Narokobi i tok Naijeria em wanpela Afrika kantri husat i gat bikpela wel tru insait long wol na i save mekim planti mani tru. Tasol mani tru i no save go long kirapim na stretim kantri bilong ol na ol pipel i stap olsem ol lus man tru. Na Naijeria i kamap olsem wanpela turangu kantri tru insait long wol na ol ami i kirap na tekova long gavman na ronim kantri.

Mista Narokobi i tok taim em i skelim dispela wantaim PNG, em i lukim olsem fridom o demokresi we ol pipel i save amamas long mekim samting fri na amamas long kisim gutpela sevis helpim i abrusim mak bilong go nogut nau. Na dispela

em i sain bilong kantri i go nogut nau, Mista Narokobi i tok. Lida bilong Oposisen i tok taim dispela gavman bilong Bill Skate i wok long rausim ol man long wok na putim ol lain bilong ol yet long kisim posisen long wok, dispela i soim piksa olsem gavman i no moa bihainim stretpela rot bilong kisim ol wokman.

Taim gavman i no givim mani bilong olgeta pipel na givim tasol long sampela lain bilong ol yet, gavman i soim wansait pasin long bagarapim ol arapela na mekim gut long ol arapela. Taim ol kot sistem bilong kantri i mekim sampela disisen we ol pipel i no amamas long en, dispela i soim olsem sampela samting i asua long sistem bilong kantri we ol pipel i save amamas long en bipo. Taim ol jas bilong kot yet i nogat bilip long narapela na i laik daunim narapela, dispela i soim sampela samting i asua nau long kot sistem bilong kantri, Mista Narokobi i tok.

Mista Narokobi i askim ol lida bilong palamen olsem i gutpela long ol i mas stap long Oposisen sait nau bikos nau em i taim bilong ol pipel i ken glasim tru wanem asua na bagarap i kamap na husat i kamapim ol dispela bagarap. Em i tok ol lida i no ken kirap nogut na kalap

lusim Oposisen na i go long gavman bikos ol i smelim gutpela swit loli i stap long hap olsem na ol i laik go kisim. Nogut gutpela ol lida i go insait na bung wantaim ol asua we i stap pinis na ol bai kisim bagarap bilong ol narapela lain.

Mista Narokobi i tok taim gavman i givim samting wantaim tingting bilong winim sapot na biknem, bai ol arapela lain i nogat na kisim hevii.

Lida bilong Oposisen i tok taim em i skelim pasin bilong Naijeria wantaim PNG, tupela kantri wantaim i bikpela risoses. Naijeria i pulap long wel bilong wokim bensin, kerosin, disel, wel bilong ka na planti arapela samting. Tasol taim yu laik baim bensin bilong ka, bai yu wet long longpela lain tru o tupela de samting long kism bensin. Mani bilong ol tu i pundaun olgeta na olgeta samting long hap i kos bikpela mani moa. Long skelim dispela wantaim PNG, PNG i gat planti risoses olsem wel, kopa, gol na arapela moa. Tasol kantri i sot nau long mani na prais bilong olgeta kaikai na ol samting i dia tumas. Strong bilong mani (Kina) i daun tru long mani bilong Australia na Amerika. Na dispela i soim olsem kantri i gat planti samting tasol em i sot long mani.



163 Sios helt woka i no kisim pe

WENCESLAUS MAGUN
i raitim

163 SIOS helt woka bilong Sandaun Provins i no kisim pe bilong 5-pela foitnait stat long Januari 1 i kam inap tude. Ol i no kisim pe na tu i no kisim ol arapela mani bilong wok ol i mekim, Siaman bilong Sios Medikel Kaunsel long Sandaun Provins, Isidor Nonori i tok.

Ol dispela Sios helt woka i wok insait long ol haus sik bilong Baptis Sios, Kristen Bredren Sios, na tupela Katolik Daiosis bilong Aitape na Vanimo. Dispela i kamapim olsem 25 haus sik bilong ol Sios insait long Sandaun Provins na i lukautim samting olsem 105,600 pipel olgeta.

Mista Nonori i tok tu olsem ol Sios helt sevis insait long Sandaun Provins i no kisim opere-senel grant o mani bilong ronim wok bilong tupela rurel haus sik, wanpela bikpela helt senta, 19

helt sab-senta na wanpela aid post long dispela yia.

"Mipela i wok long bungim ol wankain hevi bilong ol arapela yia gen long dispela yia. Na dispela em i wanpela bikpela wari tru i mekim het bilong mipela i pen pinis. Mipela i laik mekim wanpela bikpela na spesel askim i go nau long Nesenel Gavman na Fainens Dipatmen long givim mani kwik long ol Sios helt sevis bilong Sandaun Provins," Mista Nonori i tok.

Em i tok tu olsem eria medikel stoa long Wewak i no inap saplaim ol medikel saplai i go aut long Sandaun Provins bikos i no gat mani bilong baim sip na balus.

"Olsem na ol helt woka i no inap karim aut klinik bilong ol mama na pikinini krismas bilong ol i aninit long 5 yia," Mista Nonori i tok.

Em i tok namba bilong ol mama na pikinini long Sandaun Provins i kamap klostu olsem hap bilong olgeta populesen long provins. Olsem na sapos ol i no kisim kwik marasin ol bai bungim planti sik

na planti inap dai.

Mista Nonori i go het na askim Dipatmen bilong Pesenel Menesmen, Nesenel Gavman, Fainens Dipatmen na Helt Dipatmen long putim nem bilong ol Sios helt woka i go insait long kompyuta na tu kamapim wanpela sistem tasol bilong baim ol Sios helt woka insait long kantri.

Mista Nonori i save olsem ol i stat pinis long mekim dispela tasol em i askim ol long mekim kwik bikos ol helt woka i karim bikpela pei longpela taim pinis na em i no gupela long gavman i isi isi long dispela wok.

Em i tok tu olsem ol Sios helt sevis insait long Sandaun Provins i gat tingting long kamapim wanpela posisen bilong Gavman na Sios liaisen opisa. Wok bilong dispela opisa em long toktok wantaim gavman long ol polisi bilong Sios helt sevis, baset, projek sab-misen na wok wantaim ol non-gavman ogenaesen na ol arapela grup bilong kamapim gupela helt sevis.

Kot stapim Wuwanai Kampani

FELIX RAMRAM i raitim

NESENEL Kot i stapim Wuwanai Pty Ltd, wanpela kampani bilong ol papagraun insait long Bewani sab distrik long Vanimo Sandaun Provins, long Oktoba 19, 1998 bikos ol papagraun i no bin bekim dinau mani kampani i bin kisim long sampela lain. Dispela i kamapim bikpela bel hevi namel long ol papagraun.

Mausman bilong ol papagraun, Peter Onikre na Tony Absolom i sutim tok long eksekutiv bilong Wuwanai papagraun kampani long karim dispela hevi na mekim olgeta samting long pawa ol i gat long lukim olsem ol papagraun i kisim trupela save na tingting long dispela hevi kampani bilong ol i bungim.

Mista Absolom i tokim Wantok long Vanimo olsem Waigani Kot i mekim oda tu olsem Rob Southwell bilong "KPMG Chartered Accounts" i kamap long klosim daun Wuwanai Pty Ltd.

Tupela mausman ya i tokaut tu olsem olgeta papagraun na ol sia holda i no gat save hamas mani kampani bilong ol i gat dinau i stap.

"Na dispela wantaim ol narapela samting, eksekutiv i feil long kolim miting na tokim ol papagraun," Mista Absolom i tok.

"Mitupela bai traim olgeta samting long painim aut sapos i gat sampela rot we mipela inap apil egensim dispela disisen. Sapos i gat kaikai bilong dispela, bai mipela i kotim eksekutiv long no mekim gut wok bilong ol we i mekim kampani i mas klos daun," Onikre na Absolom i tokim Wantok.

Insait long narapela Kot i kamap long Vanimo yet bihainim wanpela tok pait i stap namel long tupela grup husat i tok ol i gat rait long holim opis olsem eksekutiv bilong Wuwanai Pty Ltd, Vanimo Distrik Kot long Februari 18 long dispela yia i tok olsem dispela tupela grup wantaim em ol rong lain bikos ol i nogat nem long rejista buk bilong Invesmen Promosen Atoriti (IPA).

Distrik Kot Mejistret Jack August i tokaut long tupela grup ya olsem nem bilong eksekutiv we IPA i luksave long en em Menesa Peter Epoon; Seketeri Francis Zulu. Na ol narapela em Martin Umpa husat i dai pinis, Robert Piru na Mathew Ezra.

Nesenel Kot nogat taim bilong harim olgeta kes.

Rifom i no wok long Sandaun

OL KOMYUNITI lida na pipel insait long Sandaun i no lukim kaikai bilong rifom sistem insait long provins, stat long taim ol i bringim dispela gavman sistem i go insait long provins long Julai 1994 inap dispela yia. Wanpela Lokol Level Gavman Presiden insait long Nuku Distrik, Titus Suweri i mekim dispela toktok.

Mista Suweri i tok dispela sistem i givim bikpela sans long ol LLG gavman opisa long yusim dispela sistem long amamasim ol yet. Em i tokim Wantok long Vanimo olsem planti lain i lukim nogut bilong olpela provinsel gav-

man sistem na ol i sapotim dispela rifom sistem. Tasol long 1994 i kam inap nau insait long Sandaun, ol pipel i wet yet long lukim kaikai bilong dispela rifom sistem.

Em i tok hevi bilong rifom sistem bilong gavman i no wok insait long Sandaun. I go wantaim bikpela hevi bilong kantri i nogat mani i givim bikpela hevi tru long ol pipel bilong ol ples long i no lukim gupela developmen i kamap insait long distrik na ol liklik ples bilong ol. Em i tok as bilong dispela rifom em long ol pipel yet i kamapim tingting wan-

taim wanem kain ol wok developmen ol yet i laikim long kamap insait long ples bilong ol. Narapela as tingting em taim bikpela gavman i brukim mani, bai mani i go daun stret long ol manmeri long ples. Tasol em i tok dispela sistem i nogat mani long en na i kamapim pinis bikpela hevi insait long ol komyniti insait long Sandaun.

"Dispela toktok bilong 'bottom up planning' mipela ol lida i no lukim i kamap long provins. I gat narapela sistem ol i kolim 'middle up planning', na dispela em ol LLG gavman opisa i kamapim ol plen long laik bilong ol yet. Ol i komitim mani long laik bilong ol yet. I no gat wok bung i stap wantaim ol ilekted lida na pipel," Mista Suweri i tok. Em i tok planti ol dispela opisa i save westim planti taim na tu mani long mekim ol wokabaut i go kam long Vanimo. Bikpela mani i lus long baim tiket bilong balus, haus bilong slip na mani bilong baim ka. Antap long dispela mani i lus long baim ol bilong telepon.

"Moa yet, kantri i gat dispela bikpela hevi bilong i no gat mani, tasol long Vanimo bai yu lukim pes bilong ol LLG opisa i pulap klostu olgeta wik long taun," em i tok.

Nesenel Kot nogat taim bilong harim olgeta kes

NESENEL Kot i sot long taim bilong harim olgeta kes i stap long lista bilong harim kot long wanpela wik long Sandaun. Vanimo Kot Haus i tokim Wantok olsem ol i ting wan wik (Mas 15-19) we Nesenel Kot seket bai i mekim wok bilong en long harim ol kot kes long Vanimo bai i no inap.

Ol lain husat bai kamap long kot, namba i winim 100 olgeta. Vanimo Kot Haus i tok ol i no save olsem wanem bai Jas bilong Nesenel Kot inap harim olgeta dispela kes long wan wik.

Ripot bilong Vanimo Kot Haus i tok ol kes bilong 1986-1989 i gat 10-pela olgeta na bilong 1990-1999 namba i sanap long 105. I gat 36 sivel kes; 17 kes bilong paulim mani; 15 kes bilong kilim man, strongpela laik long kilim man na kilim man lo i no tok orait long en na 7-pela kes bilong repim meri wantaim ol arapela kes.

Ol lain i sanap long wet kot em 39 olgeta.

Ripot i tok i gat tu ol kes bilong Aitape, Lumi na Nuku ol i salim i go daun long Vanimo. Ol kes bilong Aitape em 19, Nuku 4 na Lumi 2. I gat 7-pela aplikesen bilong pait long rait bilong man i stap tu.

Ripot i tok namel long dispela lista bilong Nesenel Kot i gat wanpela bilong Aitape taun na wanpela sinia pablik seven bilong Sandaun i kotim Sandaun Dipatmen long i no putim em hariap long wok maski i gat oda pinis long em i mas go bek long wok bilong em.

Namel long ol lain husat bai sanap long kot long sas bilong paulim mani, em Sandaun Gavana John Tekwie, Edministreta Gerald Poivi, na olpela Telefomin MP, Bob Nitin.



■ Saiman bilong Fan bilong lukautim ol pikinini papamama bilong ol i dai, Paul Teptario i sanap long rait han wantaim 29 sumatin bilong Arop komyniti skul wantaim ol lida bilong ples bilong ol. Foto: John Samar

BIG HI-WAY BEER

Paradise



Lijen bilong Maria holim ritrit long Banz peris

JOSEPH KUPIE i raitim

OL Katolik manmeri bilong ol liklik auttesen long Banz peris i bin bung long wanpela spesel Ritrit bilong Lijen bilong Maria.

Dispela Ritrit i bin stap 2-pela fulde na 486 manmeri i bung long kisim dispela skul.

Presiden bilong Lijen, Wendalin Wandu i tok Peris pris Pater Paul wantaim wanpela sista bilong Madang Daiosis i bin givim strongpela skul long ol lijen memba i mas go insait long mekim wok aposel.

Ol i mas karim hevi na mekim wok bilong autim gutnius, strongim ol Kristen husat i no strong long ol spirituel samting na bringim ol i kam bek long sakramen bilong sios.

Mista Wandu i tok wok aposel bilong ol lijen memba bai i no lus nating. Taim i klostu na planti lus Katolik i mas kam bek long ol sakramen. Em i tok ol Lijen memba i kisim skul long mekim wok aposel long olgeta lain, sios grup na pipel maski sapos ol i no laik harim tok.

Banz Peris i gat 4-pela auttesen, Kuiona, Tolu, Ambang na Dalba na wok bilong Lijen bilong Maria i kirapim paia long ol dispela 4-pela auttesen.

Mista Wandu i tok ol Lijen i bihainim pasin na wok bilong Santu Maria husat i tok yesa long God na kamap mama bilong Sevia na Redima bilong yumi Jisas Krai. Nau yet Maria bai go pas long ol Lijen bilong em na helpim na strongim ol long taim ol Lijen i sot long strong na save.

24 nupela pasto greduet

TWENTI foa nupela pasto i bin greduet long Luteran Seminari Ogelbeng insait long Mt Hagen long mekim wok pasto insait long Evangelikol Luteran Sios ov Papua Niugini.

Dispela em namba 20 greduesen bilong seminari.

Ol 24-pela ol greduet i pinisim skul bilong ol long Ministeriel Trening long stadi bilong Tioloji na kisim setifiket bilong Tioloji. Namel long ol lain sumatin husat i pinis, tupela greduet i kisim tu setifiket bilong diploma bilong Tioloji.

Insait long dispela namba 20 greduesen i bin i gat olsem 19-pela ol meri tu husat i pinisim stadi bilong helpim ol pasto long dispela kos bilong ol meri progrem em seminari

i save ronim long helpim ol meri bilong ol pasto. Em i bin nambawan taim tu long seminari i givim wanpela liklik hap setifiket long toksave long kos em ol meri i bin pinisim long skul.

Planti ol visita, ges, wantok, pren na famili na ol kristen manmeri bin kam na witnesim dispela greduesen, salim ol nupela wokmanmeri i go aut long mekim wok pasto long gaden bilong bikpela papa God.

Wanpela pesman bilong Evangelikol Interan Sios ov PNG (ELC-PNG), Rev Giegere Wenge, husat em i dairekta bilong Dipatmen of Ministeriel Trening insait long Sios tu bin sindaun long greduesen wantaim ol arapela ges bilong ol institusen bilong sios olsem long Luteran

Sios Koles Banz, priminispol bilong St Timoti Seminari long Birip, Wabag aninit long Gutnius Interan Sios, na tu ol distrik lida bilong 5-pela ol Hailans distrik bilong ELC-PNG.

Rev Wenge i mekim strongpela tok i go long greduet olsem ol pasto i no olsem ol fotnait wokmanmeri, tasol i gat singaut bilong God long dispela wok yupela i laik mekim long en namel long ol manmeri.

Rev Wenge i tok olsem, "pasto en i olsem sumatin long tok bilong God oltaim. Yupela i mas stap olsem sumatin yet long skul moa long tok long helpim bilong wok bilong Holi Spirit."

Em i tokim ol, "singaut bilong yupela i gat blesing bilong em i kam

long God long laip bilong yupela. Olsem yupela i ken i goaut na givim bai na laip bilong yupela long wok bilong God.

Wanpela olupela misineri Rev. Helmut Horndarsch na meri Misis Irgard Horndarach tu i kisim tok gutbai na tok tenkyu long go bek long asples bilong ol long Bavaria, Germani. Tupela i bin givim bikpela taim na strong wantaim bilip bilong ol long wok gutnius insait long Luteran Sios inap olsem 40-pela yia olgeta.

Klostu moa olsem 1000 manmeri i bin stap long dispela taim, wanpela lain grup i bin kam long Neumarkt Seket long Bavaria, Germani. Em ol lain seket i wok poroman wantaim Ogelbeng seminari.



• Yomgai danis grup long 6-mail rabis damp i wok long wetim Kruse long las wik.

Planti bilong Goilala i givim laip bilong ol long Jisas

MOA long 5000 pipel bilong Goilala i beten wantaim "kruse 105" taim ol i karim dispela kruse long Badihagwa i go long Baruni, Hanuabada, Badili, tu Mail na Siks Mail setelmen.

Insait long wik, ol pipel i kilim 10-pela pik na moa long 20 singsing grup i bin singsing na mekim wan-

pela bikpela selebresen bilong ol Goilala long Mosbi siti.

Long Baruni ples moa long 21 man nogut i lusim pasin nogut na i givim gan na laip bilong ol i go long Jisas. Long wankain taim 50 yut i lusim pasin nogut givim gan bilong ol i go long plis na i bihainim diwai kruse. 151 yut bilong Goilala,

Kokoda, na Popondetta Katolik na Angliken Sios i karim kruse long siti.

Steven Ine i go pas long grup bilong ol Goilala yut, Thomas Yagame i go pas long Popondetta Katolik grup na Pater Cornelius i go pas long grup bilong ol Anglican. Ol komyuniti bilong Goilala insait long siti i bin joinim ol grup i karim kruse

na wokabaut long de na nait. Katolik yut lida Daniel Mona i tok ol Goilala pipel insait long siti i mas harim skul bilong diwai kruse na ol lida biong Goilala na Oro provins na tanim bel. Em i tenkim Ledi Carol Kidu na Minista biong Graun na memba bilong Henganofi, Viviso Seravo long kaikai na dring.

TU MINIT TINGTING

Wanem kain wok i win?

WANPELA de wanpela boi bilong bikbus i kam painim wok long wanpela fama. Fama i orait long boi na i salim em i go brukim paiawut. Bihain long sampela awa, fama i go sekap long wok bilong wokboi. Em i kirapim nogut long lukim boi ya i bin pinisim wok insait long sotpela taim tasol.

Orait, long tumora fama i tokim wokboi olsem. "Nau yu lainim ol dispela hap paiawut insait long woksap bilong mi." Fama i ting dispela wok bai pasim wokboi inap long apinun. Long belo em i go lukim em, na boi ya i bin pinisim olgeta wok pinis.

Long namba tri de, fama i tokim wokboi olsem: "Tude bai mi

givim yu wanpela wok isi. Long bakstua i gat planti kaukau i stap. Orait, mi laik bai yu go sekap long ol. Yu mas putim olgeta gutpela kaukau long wanpela hip. Na olgeta kaukau i nogut liklik, ol i mas i go long namba tu hip. Na olgeta kaukau i sting pinis, ol i mas go long namba tri hip." Orait, nau fama i go bek long haus bilong em.

Bihain long sampela awa em i kam bek gen na i lukim dispela wokboi i slip long graun na i hap dai. Em i tromoim sampela wara antap long pes bilong boi, na

kirapim em bek. Nau fama i askim wokboi long wanem sik i bin kamap long em. Na wokboi i tok olsem: "Bilong mekim dispela wok bilong skelim tripela kain kaukau, mi mas tingting tumas. Wok tingting ya i bin paulim het bilong mi, na mi airaun na mi pundaun na hap dai i stap. Mi no inap long dispela kain wok we mi mas tingting. Nogat. Em i hevi tumas long mi. Mi inap wok wantaim han. Tasol wok wantaim het na tingting, em i save bagarapim mi."

I gat tupela bikpela kain wok: wok yumi mekim wantaim han, na




Fr. FRANK MIHALIC

wok yumi mekim wantaim het. Planti manmeri nating husat i save wok wantaim han bilong ol long ol

faktori na fam na bus, ol i save ting wok bilong ol tasol i wok tru. Ol i save ting wok tru em i min skin bilong pukpuk.

Ol i save ting, ol manmeri i wok long olkain opis we ol i pasim naispela klos em ol manmeri bilong pilai nating. Dispela i no tru, olsem stori bilong tude i soim. Ol saveman tru i wok wantaim het, na ol i kisim pe antap moa. Ol manmeri i wok wantaim het ol i save kisim planti moa kain sik, na painim planti moa wari. Sapos i nogat of opis pulap long ol manmeri i wok wantaim tingting na het, bai nogat siti olgeta, bai nogat gavman, bai ol manmeri i stap long bus yet na wokim gaden tasol.



Hailans Nius

Simbu na Kagua Erave go long ileksen

OL PIPEL bilong Simbu na Kagua Erave bai stap long ileksen long votim nupela memba bilong ol long nesene palamen long neks wik.

Simbu na Kagua Erave i go long ileksen bihain long kot i bin rausim olupela memba Pater Louis Ambane na David Basua long dispela tupela ilektoret.

Nominesen na kempen i bin stat long tupela mun i go pinis. Nau em taim bilong vot.

Bilong Kagua Erave, vot bai stat long dispela wik Sarere Mas 13, 1999. Taim bilong ol ileksen tim long go raun na kisim vot em klostu tu wik olgeta.

Ritening Opisa o man i go pas long ileksen long Kagua Erave bai ileksen, Alphonse Yapen i tok, ol ileksen tim bilong em bai stat long Erave distrik pastaim na bihain i go long Kagua distrik. Em i tok, ol wok manmeri bilong ileksen bai traim long mekim wan de ileksen long ol planti hap bilong ilektoret.

Namba bilong ileksen tim long wok long Kagua Erave em 79.

Ol samting bilong vot olsem ol balot bokis na balot pepa i redi na nau i stap long Mendi.

Long Simbu, vot bai stat long Karimui/Nomane ilektoret pastaim na bihain i go pinis long Kerowagi. Ol pipel long Simbu em bai ol i votim nupela rijional memba bilong ol.

Bai i gat planti ileksen tim i raun long wan wan ilektoret long provins long kisim vot. Vot long hap tu bai kisim tupela wik.

Kempen long tupela ilektoret i bin go isi na i no gat wanpela bikpela trabel i kamap. Tasol ol plis bai aut wantaim ful fos long was long ol ples bilong vot nogut sampela ol birua i kamap.

Minj ripot i go pinis long Kapal Haus

MINJ Distrik Edministresen i salim pinis wanpela ripot i go long Provinsal Edministrata, Dokta Thomas Webster long hevi bilong ol gavman haus long

distrik. Dokta Webster i bin askim Minj Distrik Edministrata long wokim dispela ripot bihain long Wantok niuspepa i bin

putim aut wanpela stori we ripot long distrik i tok ol man nating i pulamapim ol gavman haus long Minj.

Ripot Wantok i kisim i

tok, planti ol haus i stap nau long han bilong ol man husat i lusim wok wantaim gavman, ol olupela pablik sevan na ol man nating

bilong ples.

Ripot tu i tok olsem ol lain husat i no kisim tok orait na stap long ol dispela gavman haus i gat banis pik na kakaruk arere long ol haus.

Waghi Mek tok plis yusim ol "raskol"

PETER MAIME i raitim

MENESMEN bilong Waghi Mek Plentesen insait long Westen Hailans i sutim tok long plis olsem ol i bin yusim ol "raskol" long mekim wok bilong ol.

Waghi Mek Plentesen Menesmen i tok olsem las wik plis long Westen Hailans i bin kisim sapot long sampela ol "raskol" man long raunim ol wok man bilong Wagmil Kopi Plentesen klostu long Kujip na i go insait long kisim mensesa bilong plentesen, Luke von Boehm.

Hailans Divisinal Komanda, Mathew Minok i tok "ol liklik wait komyuniti long Waghi Mek" i save sutim tok nating long ol plis. Em i tok "ol waitman i save toktok planti long ol liklik samting tumas." Em i tok moa olsem Mista von Boehm em ol plis i sasim em pinis long em i bin

gat ol drak, ol katres na samting bilong gan, na tu visa o tok ofait pepa bilong em long stap long PNG, de bilong en i pinis. Em i tok kot bilong dispela ol sas i stap yet.

Hevi tru i stap long sait bilong menesmen bilong Waghi Mek long ronim kampani bilong Not na Saut Waghi Lokol Gavman Kaunsil na "Dick Hagon wantaim ol lain bilong em i save traim long abrusim dispela samting na poinim han long ol plis, Aisisten Komisina Minok i tok.

Tasol kampani Menesmen i tok, long Fonde las wik long 11:30 moning, tripela plis ka wantaim ol plisman na wanpela rakol man (ol i kolim nem) i pusim ol yet long geit na laik traim long go insait long Wagmil Kopi Plentesen.

Ripot long menesmen i tok, wanpela sekyuriti gad i promis long kot pepa olsem wanpela plis ka i pulamapim ol plisman wantaim gan

na tu ol asples man bilong Miamka Tarukup i bin stap insait long dispela taim. Plentesen menesmen i tok, ol haus lain bilong Miamka Tarukup long Kudjip i bin brukim wanpela bikpela haus stoa bilong plentesen long las yia. Dispela bagarap em kos bilong em i moa long K300 tausen.

Ripot i tok olsem dispela sekyuriti gad ya i tok olsem, "Ol plis long wanpela Toyota Hilux i odaim mi long opim geit na bai ol i go na kisim Luke von Boehm.

"Taim mi tok olsem em i no stap insait, ol plis man na ol lain long ples i tok strong olsem mi giaman na ol i pretim mi long kilim mi wantaim gan sapos mi no opim geit."

Ripot ya i tok olsem, dispela sekyuriti gad i tok moa olsem em i pret nogut tru na i bin opim geit na ol plis i go insait long painim Mista von Boehm long haus bilong em, na

ol "raskol" man i singaut na ronim ol sekyuriti gad autsait.

Ol plis i no panim Mista von Boehm long haus bilong em na lusim tok wantaim ol wokman long plentesen long em i mas kam ripotim em yet long plis.

Whagi Mek Plentesen Menesmen i tok, Mista Boehm bihain i bin ripot long Hagen plis stesin tasol ol plis i no sasim em long wanpela asua.

"Mipela i pilim olsem plis i no mekim wok stret long dispela taim, na ating sampela lain i bin givim ol rong tingting long mekim wanem samting ol i bin mekim," Menesmen i tok.

Mista von Boehm i tok, dispela em pasin nogut ol plis man i soim long yusim ol "raskol" man long mekim wok bilong ol. Em i tok ol i mas wok long stretpela pasin long lukautim ol pipel na ol propeti o samting bilong ol pipel.



• Ol manmeri i sindaun long fran bilong NSI long Goroka. Ol wok long salim ol flawa olsem oked long ol ges i go slip long NSI hotel.

Kundiawa bai kisim nupela telepon

PETER MAIME i raitim

TELIKOM PNG i bin tokaut pinis olse em bai putim wanpela nupela telepon masin long Kundiawa.

Dispela tok em Menesing Dairekta bilong Telikom PNG, Thomas Tulin i bin mekim long wanpela pablik notis long ol niuspela las wik.

Dispela nupela masin Telikom bai putim long Kundiawa em ol i kolim DMS10 na bai inap long

karim 1024 telepon lain. Dispela masin bai redi long yusim long pinis bilong neks mun, Epril.

Dispela nupela masin Telikom bai i putim long helpim ol bisnis na gavman opis husat i bungim hevi nau long toktok wantaim ol nara-pela hap bilong kantri.

Dispela i no min olsem olgeta telepon na feks lain long Simbu bai wok. Dispela masin DMS10, em bilong daunim hevi bilong telepon long sotpela taim tasol.

Mista Tulin i bin salim tok sori i go long ol kastoma long Simbu na tok Telikom i no lus tingting long ol na nau lukluk long stretim dispela hevi bilong telepon.

Telikom PNG i amamas tasol long givim telepon sevis i go long Simbu Provins na i wok long toktok wantaim sampela ol papa graun long ol maunten long Hagen na Goroka long joinim telepon i go long Simbu, em i tok. Simbu i nogut rot long ring o salim ol feks bihain


long ol ripot olsem telepon sola penel long Maunten Kerogoma i go lus. I gat tok olsem ol papa graun i laikim bai Telikom PNG i mas pein, oi kompensesen long yusim graun bilong ol.

Nau yet, Telikom i putim 14 setelait seket o lain long sampela liklik kastoma tasol long Kundiawa. Tupela bilong ol dispela kastoma yu ken kisim long setelait namba em Provinsal Iektoret Opis na opis bilong Provinsal Plis Komanda long Kundiawa.

Long wankain taim, Telikom PNG i bin putim wanpela tok-save gen long kantri long ol pipel husat i save bagarapim na stilim ol masin bilong salim ol toktok. Em i tok long seksen 172 bilong Telikom PNG Lo, husat man i pasim o bagarapim wanpela masin bilong salim ol toktok bai kisim mekim save.

Dispela man husat i bagarapim o stilim ol masin bai baim kot long K20,000 o i ken go long kalabus long 14 yia o moa.

Madang Nius



Madang solwara bai bagarap long pipia bilong Ramu nikel

WENCESLAUS MAGUN
i raitim

SAPOS gavman i givim tok orait long Highlands Pacific Kampani long go het na kirapim Kurumbukari nikel main, wantaim fektori long Basamuk Basis, dispela kampani bai bagarapim solwara bilong Madang wantaim ol pipia bilong main. Dispela ripot i kam long Minerol Polisi Institut (MPI) long Sidni, Ostrelia.

Ripot i tok, nau yet Highlands Pacific Limited i wok long painim

mani long benk long kirapim dispela Nikel Kobalt main insait long Madang Provins.

Dispela main bai kamap long Kurumbukari klostu long Ramu Wara wantaim fektori long Basamuk Basis insait long Astrolabe Be samting olsem 75 kilomita saut long Madang taun. Highlands Pacific i gat tingting long tromoi olgeta pipia bilong fektori i go insait long Astrolabe Be solwara. Tasol ripot bilong MPI i tokaut olsem pasin bilong tait bilong solwara long Madang i soim olsem em i no gutpela long Highlands Pacific Limited i go het na tromoi ol pipia long solwara

bikos tait bai tromoim ol dispela pipia i go antap long nambis na solwara we ol pis na ol arapela samting bilong solwara i gat laip inap kaikai ol dispela pipia na dai.

Ripot i tok olsem Basamuk Basis i daun inap long mak bilong 100-300 mita.

Olsem na i luk olsem paip bilong karim ol pipia bilong main bai i go inap long dispela mak. Long taim bilong Rai na Talio, tait bilong solwara bai karim ol dispela pipia i go long ol arapela eria long nambis bilong Madang Provins na i no inap kisim ol pipia i go long bikdaun olsem ripot bilong Highlands Pacific i tok.

Gred 8 man kamapim bisnis

PLANTI ol gred 8 skul dropaut i save ting ol i nogat save na i no inap painim wok. Ol i ting ol i no inap mekim wanpela gutpela samting long laip bilong ol. Sampela i bel hat long dispela na smokim spak brus, dring bia na wokim ol pasin nogut.

Sampela ol papamama tu i kros long 'westim' bikpela mani long baim skul fi bilong ol pikinini sapos ol i go long gred 8, 10 o 12 na i no inap painim wok. Dispela em wanpela bikpela hevi long Papua Niugini tude.

Tasol Christopher Yala husat i gat 28 Krismas na i kam long Aseki ples insait long Minyama Distrik bilong Morobe Provins i no ting dispela kain laip em i gutpela.

Em i pinisim gred 6 long Aseki komyuniti skul long 1982. Em i go long Bomaiyen na Wau hai skul long wanpela yia tasol na long 1983 em i lusim gred 8 na i no moa go bek long skul bikos em i nogat mani bilong baim skul fi. Long 1984 em i wok stoa kipa na kisim sampela mani we em i bungim na baim skul bilong em long St. Joseph Teknikel skul long Lae. Em i kisim skul bilong wok kapenta na Joineri.

Long 1987, em i wok long Wau Ekoloji inap wan yia olgeta na bos bilong em i no save baim em. Olsem na long 1988 em i lusim wok. Long 1989 em i go wok wantaim Kaindi Golden Richers long Wau na i bungim Barry Larry long

dispela taim. Larry i salim em i go long Amerika long 1990 na i raun lukim 26 State bilong Amerika. Taim em i kam bek long PNG em i wok gen wantaim Larry long Wau na bihain long Tari na long 1994 em i go long Christensen Rises Institut long Jais Aben na wok inap 1997 taim CRI i pas.

Long 1998 samting olsem 6 mun olgeta Yala i wok long painim wok inap ol papagraun bilong Kau Wail Laip long Baitabag i askim em long lukautim ges haus bilong ol. Mista Yala nau i save lukautim Kau Wail Laip projek long Baitabag insait long Madang Provins.

Long taim em i nogat planti visita long dispela haus malolo, Mista Yala i save go long Alexishafen, baim ol plang long somil bilong Katolik Sios na bringim i go long Kau Wail Laip haus malolo we em i stap na i save wokim ol sia, tebol, kabot, bet, na ol kain samting olsem.

Em i winim kontrak wantaim Madang Distrik Lokol Level na Ambenob Lokol Level Gavman long wokim wok bilong ol. Mista Yala i bilip planti ol skul liva inap mekim gutpela samting long laip bilong ol sapos ol i bilip long ol yet, na tu papamama na komyuniti i mas sapotim ol.

Gavman mas sapotim Balek Wail Laip

MADANG Provins i gat nem long Papua Niugini na wol olsem wanpela naispela provins. Pasin bilong ol pipel na bus, graun, solwara, ol ailan, maket i gutpela tru. Wanpela ples we i save pulim planti turis long go em Balek Wail Laip namel long foamail maket na Gogol bris.


Planti lain i save long Balek Wail Laip olsem blu wara o smel wara bikos kala bilong wara long Balek Wail Laip i blu na dispela wara i gat strongpela smel. Wanpela papa bilong Balek Wail Laip, Wagum Tegil i tokim Wantok olsem ol pipel bilong em i save waswas long dispela wara bikos wara ya i save pinisim ol kainkain sik olsem grille na sua long bodi bilong ol.

Wantok i painim aut tu olsem long dispela wara yu no inap kilim ol pis, trausel na ol abus. Long dispela as i gat planti pis, trausel na ol abus bilong wara i stap. Dispela wara i kamap insait long hul bilong graun long maus bilong wanpela 'cave' o hul i go insait long graun. Long maus bilong dispela 'cave' yu inap painim planti ol trausel i stap.


Balek Wail Laip i gat nem tu long histori bilong Madang. Em wanpela ples we ol ekta bilong Robinson Crusoe i bin go ektim piksa long en. Olsem na Balek Waip Laip i gat nem long wol tu. Dispela i save pulim planti ol turis long go long Madang na lukim Balek Wail Laip.

Tasol Mista Tegil i tok, Madang Provinsel Gavman i no luksave long dispela. Em i tok inap long Madang Provinsel Gavman i sapotim ol papagraun long kamapim wanpela gutpela ges haus o helpim ol long statim wanpela turis bisnis tasol bikos dispela i no stap, biknem bisnis man long Madang Peter Barter i yusim ol long mekim moa mani na long wankain taim i save baim ol K2 tasol long wan wan turis i go long Balek Wail Laip.

Mista Tegil i singaut strong i go long Madang Provinsel Gavman long luksave long ol wail laip eria bilong Madang na putim mani na ol arapela helpim olsem ol save-man bilong helpim ol papagraun long lukautim gut wail laip eria bilong ol na pulim moa turis i go long Madang Provins.



■ Mista Yala i soim sampela ol bed, sia na tebol em i save mekim na salim bilong kisim mani.



■ Mista Tegil i soim ripota Wenceslaus Magun long Balek Wail Laip

Mindere pipel no amamas long mausman bilong ol

WENCESLAUS MAGUN
i raitim

OL PIPEL bilong Mindere we Highlands Pacific Limited i gat tingting long kamapim fektori long Basamuk Basis i tok ol i no laikim ol mausman bilong ol. Dispela em wanpela hevi we i bin kamapim bikpela pait taim ol pipel bilong Mindere i bin go long kompaun bilong Highlands Pacific Limited na i bin brukim windua bilong ka bilong kampani na ol windua bilong haus na bagarapim ol ara-

pela samting long las mun.

Wanpela mausman bilong ol pipel bilong Mindere, Noah Mulung i tokaut long dispela taim em i bin bungim Wantok long Madang long wik i go pinis.

Mista Mulung i tok, ol pipel bilong Mindere i gat bikpela bel hevi long ol mausman bilong ol bikos, planti taim ol dispela mausman i save slip, kaikai, na raun wantaim ol wokman bilong Highlands Pacific Limited. Dispela pasin i pasim ai, na maus bilong ol long makim ol pipel bilong ol long ples.

Em i tok ol pipel long ples Mindere i pret tru sapos kain pasin

i go het, ol dispela mausman bilong ol i no inap harim wari tru bilong ol pipel long ples, kisim maus bilong ol na toktok wantaim Highlands Pacific Limited.

Mista Mulung i tok tu olsem ol dispela mausman bilong ol i no bin gat taim long harim wari na tingting bilong oi pipel bilong ol long ples. Na tu taim ol i save go long kibung bilong Highlands Pacific Limited ol i no save go bek long ples na tokim ol pipel wanem toktok ol i harim long kibung.

Mista Mulung i tok taim ol pipel long Mindere ples i askim long holim wanpela miting bai ol i ken go het na makim ol wokman

bilong opis bilong asosiesen bilong ol papagraun, Highlands Pacific Limited tu i wok long surukim dispela taim. Olsem na olgeta dispela hevi i bin mekim bel bilong ol pipel i bel hat tru.

Em i tok taim ol pipel long Mindere ples i go long kompaun bilong kampani na bagarapim ol samting, wantu tru ol plis i bin go long Mindere ples, holim pas ol pipel na sasim ol na kisim ol i go long plis stesen. Tasol taim Madang Lokol Kot i salim ol i go bek long kiap bilong Raikos long harim dispela hevi, ol plis long Madang i no bin helpim ol pipel long ples.

Mista Mulung i tok tu olsem ol pipel bilong Mindere ples i no amamas long ol wokman bilong Highlands Pacific long Mindere bes kem. Em i tok ol kain man olsem Tonny i no save sindaun wantaim ol pipel long kisim tingting na wari bilong ol na tokaut long wanem kain ol samting Highlands Pacific i gat tingting long mekim.

Mista Mulung i singaut strong i go long Madang Provinsel Gavman long glasim gut ol hevi bilong ol pipel bilong Mindere na holim kwik ileksen bilong makim ol nupela eksekutiv bilong asosiesen bilong ol papagraun.



Nupela kalsa senta long Lae i stap long plen

GAVANA bilong Morobe provins Luther Wenge i plenim long dispela wangepa bikpela kalsa senta long Lae siti.

Dispela nupela senta em POSF na Morobe provinsal gavman yet bai go pas long kamapim.

Dispela em long pulim moa turis i kam insait long provins. Wok long dispela kalsa senta bai i stap klostu long we ol spots graun i wok long i stap nau bihain long provinsal gavman na POSF sainim ol pepa wok long mun Jun.

Mista Wenge i tok dispela kalsa senta em stat bilong ol progrem long turisim indastri long provins.

"Morobe provins i gat bikpela sans, we mi ken mekim i go long tru wok bilong kisim mani," Mista Wenge i tok.

Em i tok olsem dispela kalsa senta bai mekim ples bilong kalsa long Morobe provins na tu ol arapela kalsa.

Provinsal gavman bai kisim lon (dinau) long POSF long wokim dispela senta na long dispela yia provinsal gavman sapotim ol papa bilong ol ges haus long olgeta hap long

provins long stretim gut ol sevis na kamapim gut ol samting bilong ol turis, Mista Wenge i tok.

Long moa fanding bai kamap long yia 2000 baset long dispela progrem, namba tu minista bilong turisim na memba bilong Kabwum Ginson Saonu i bin go wantaim Mista Wenge na Turisim Promsen bos Kevin Byrne long lukluk raun insait long provins stat long Finsafen, Sialum, Kabwum na Teptep.

Dispela wokabaut raun em long soim bos bilong turisim long wanem samting Morobe provins i ken mekim long putim turisim. Lae risort we ol i save kolim olsem pot hol mil, bai lukim senis kamap bihain long K40 milien projek we Australian gavman i bin fandim.

Mista Wenge i tok provinsal gavman tu i askim Australia gavman long givim moa sapot long dispela projek.

Em i tok olsem ol dispela projek i mas kisim samting olsem K140 milien moa long pinisim olgeta wok long rot we em i tok sapos nesenel gavman i ken sapot long K50 milien long neks yia.

Wenge skelim hevi bilong boda long provins

FRANCO NEBAS i raitim

MOROBÉ Gavana, Luther Wenge i laikim gavman long lukluk gen long ol boda long Morobe provins distrik we sevis i go long ol pipel mas wankain.

Mista Wenge i tok em i laik lukim ol distrik wantaim liklik graun na liklik populesen mas kisim moa erias, na ol bikpela populesen bai mas go daun.

Em tok tu olsem em bai toktok long Wau-Bulolo ilektoret long bruk i go long tupela. Garaina i kamap olsem narapela ilektoret bilong en yet.

Garaina bai i gat memba bilong en yet long palamen. Long las wik ol pipel long Garaina i petisenim Gavana long wankain samting long kamapim

nupela ilektoret, we ol i tok olsem ol i no save kisim wankain sevis olsem long Wau-Bulolo long wanem ol i save lukluk tasol long dispela hap.

"Mi sapotim dispela hevi bilong ol long wanem, distrik ya em i bikpela tru na sevis i no save go long ol pipel stret long ples. Morobe em bikpela provins long graun bilong en na tu populesen," Wenge i tok.

Long wanem long liklik namba bilong ol distrik, mani kam long Nesenel Gavman na arapela mani kam insait tu i no kamap long ol pipel i no gutpela tumas.

"Ol mani tu we i kam insait long provins i no gutpela tumas long karamapim ol laikim bilong populesen bilong yumi."

Garaina em sharim bod wantaim Galp na Sentrel provins na Biaruru wantaim Oro provins. Ol

arapela eria long dispela ilektoret, olsem Mumeng, Watut na Buang tu i no kisim ol gutpela sevis," Wenge i tok.

Em i tok em bai moa gut long narapela ilektoret long ol ausait eria.

Ol arapela ilektoret Mista Wenge i tok tu em, Tewae Siassi, Huon Galp na Lae. Em i tok em bai traim kisim dispela i go long Provinsal Eksekutiv Kaunsil long kisim tok orait bilong ol na bai askim Nesenel Bandri Komisen lukluk long dispela hevi bilong bod.

Em i tok komisen bai mekim ripot i go long NEC na Nesenel palamen long fainel tokorait.

Wenge i tok em bai toktok wantaim ol arapela Morobe memba long dispela boda hevi we em i bilip olsem ol bai sapotim em.

KABWUM RIPOT

Kabwum pipel lukim Spika namba wan taim

SPIKA bilong nesenel palamen John Pundari i bin go long Kabwum distrik long las wiken olsem namba wan spika bilong nesenel palamen long go long hap.

Dispela em astingting bilong memba bilong Kabwum Ginson Saonu long kisim ol bikman na lida bilong Papua Niugini i go long Kabwum bai olgeta pipel bilong em i ken lukim ol na save long ol na kisim save long wanem kain wok ol dispela lida i save mekim insait long kantri.

Mista Pundari i bin go long Kabwum las wiken wantaim Morobe Gavana Luther Wenge, Helt Minista Ludger Mond na Kabwum memba Ginson Saonu long opim wangepa opis bilong helt senta, 5-pela haus bilong pablik sevans na givim wangepa nupela jenereta bilong pulim pawa long distrik.

Spika Mista Pundari i opim dispela 5-pela haus, Helt Minista Ludger Mond i opim dispela nupela helt opis na Gavana Wenge i opim dispela nupela pawa jenereta. Kos bilong olgeta dispela samting i moa long K20,000.

Mista Saonu i tok dispela em wangepa rot ol pipel bilong em i ken kisim save long husat em lida bilong kantri na i save mekim wanem kain wok bilong kantri. Maski ol pipel bilong Kabwum i no save go long Mosbi long lukim na save long ol bikman o ritim long nius na save long ol, ol i mas gat sans long lukim long ai. Olsem na



• Memba bilong Kabwum Ginson Saonu wantaim Spika bilong palamen John Pundari na Helt Minista Ludger Mond i kamap long Kabwum distrik las wiken long opim helt opis, ol haus bilong pablik sevans na jenereta. Gavana Luther Wenge na Finsafen memba, Alfred Pogo tu i stap wantaim ol.

wangepa rot em long kisim ol i go long Kabwum bai ol pipel i ken save long ol, Mista Saonu i tok.

Mista Saonu i tok em i bin kisim tripela Praim Minista i go pinis long Kabwum we ol pipel bilong em i lukim pinis. Ol tripela Praim Minista ya em

Paias Wingti, Sir Julius Chan na Bill Skate. Nau em i laik kisim ol lain insait long sait bilong lo.

Olsem na em i stat Spika bilong palamen na bihain bai em i traim kisim sief Jas bilong kot i go long ol Kabwum pipel i ken lukim.

Dispela tu em wangepa gutpela rot ol Minista o bikman olsem i ken tokim ol pipel bilong Kabwum wanem kain wok ol i save mekim na wanem kain helpim ol i gat long helpim ol pipel bilong ples na kantri, Mista Saonu i tok.

Wok i stat nau long Wau Tekadu rot

ARI GUH DANDEE i raitim

WANPELA masta mak kampani nao istap pinis long Tekadu long stat makim rot bilong Wau Tekadu. Dispela masta mak kampani i bin bihainim buldok rot na igo long Tekadu long las wik Trindei na nau i stap pinis long Tekadu bilong stat makim rot long Tekadu i kam long Wau.

Bai ol i makim rot na kamap long Kujuru kam olsem long Winima na joinim Wau, Biaruru na Garaina rot.

Dispela rot bilong Wau Tekadu i bin stap aninit long plen bilong kirapim wangepa bikpela oil pam projek insait long Tekadu eria we Morobe gavana i gat laik long en olsem na ol i statim wok bilong kamapim rot i go long hap.

Morobe Gavana Luther Wenge i bin toksave olsem taim dispela oil pam projek i kamap bai Morobe gavman bai i mekim bikpela mani tru. Olsem na em wantaim gavman bilong em i stap bihain long dispela oil pam projek long Tekadu. Em i bin putim K500,000.00 bilong karim aut wok bilong putim rot long Wau go long Tekadu.


Long nau yet Wau lokol gavman kaunsil na Morobe provinsal gavman i wok bung wantaim long karim ol dispela wok bilong traim na hari-apim dispela rot long i mas pinis hariap.

Bikpela tingting i stap olsem, taim dispela rot i pinis bai ol pipel bilong Tekadu bai kisim bikpela sevis tru na laip bilong ol bai isi tru bikos ol i bin stap long hap wantaim i no gat sevis na rot bilong balus i go long hap.

Dispela rot tu bai i mekim isi long ol pipel husat bai i go i kam long wok long oil pam plentesen bikos rot bilong balus i kos tumas.

I gat toktok i kamap pinis olsem sapos dispela masta mak kampani i pinisim wok bilong makim rot na olgeta toktok na ripot i orait bai ol i stat long putim savol bilong masin i go insait long graun na stat katim rot long Winima igo long Tekadu.

LAE CITY



AUTHORITY

MOROBE

TOTOK bilong Lod Meya bilong Lae Siti, Mista Toffamo Mionzing long seremoni bilong brukim graun na kirapim wok bilong stretim rot long Lae siti

24 Februeri, 1999

Mi amamas long lukim Namba Tri Hap bilong Lae Rot Apgreding Projek i kamap nau.

Mi makim ol pipel bilong Lae na tok welkam long kontrak kampani Barclay Mowlem Construction husat bai mekim wok aninit long Namba Tri Hap bilong Lae Rot Apgreding Projek.

Ol pipel bilong Lae i lukim ol senis i kamap long ol rot insait long siti long dispela foapela yia long taim Lae Rot Apgreding Projek i stat long 1996.

I bin gat ol liklik wok bilong stretim rot i kamap long 24 kilomita rot aninit long Namba wan Hap bilong Lae Rot Projek. Dispela ol wok i kamapim gut ol rot insait long siti.

Wok bilong sanapim nupela bris long Bumbu las yia em wanpela bikpela wok aninit long Namba Tu hap bilong Rot Projek. Bumbu Bris i joinim Butibam/Malahang rot i kam long siti na tu em i sevim ol bisnis long Malahang Industrial Senta.

Ol pipel bilong Lae i lukim bikpela senis i kamap long Bumbu/Malahang seksen bilong ol rot long Lae. Dispela nupela Bumbu Bris em i wanpela bikpela samting tru i kamap long Lae Rot Projek.

Mi amamas long lukim wok i kamap nau long hap bilong Bumbu/Voco Point. Dispela em i Namba Tri Hap bilong Lae Projek. Long taim wok i pinis bai ol bisnis long Voco Point amamas bikos das i no inap karar. apim ol moa taim ol i raun i go long ol narapela hap long siti long mekim wok bilong ol.

Barclay Mowlem Construction i mekim dispela bikpela wok nau. Wok bai kamapim olpela ples

balus i go olsem long hap bilong Milfordhaven, i go long bris, Mangola Strit, Aircorps Rot na ol narapela rot long dispela eria.

Barclay Mowlem i gat nem long kamapim kwaliti wok na mi bilip bai ol i givim gutpela rot i go long ol pipel long Lae long taim dispela projek i pinis bihain long tupela yia.

Mi laik tok tenk yu tu long ol dispela pipel na ogenais-esen long helpim na kamapim dispela projek;

1. Gavman bilong Australia husat i givim mani aninit long AUSAID long kamapim Lae Rot Projek.
2. Asian Development Bank husat i givim mani long stretim rot long Malahang/Busu na Four Mile long hap bilong Okuk Haiwe.
3. Gavman bilong Papua Niugini husat i go pas long stretim rot bilong kisim helpim mani.
4. Cr. Fred Cook na Lae Rot Projek Monitoring Komiti em ol dispela lain i stap insait long en, SMEC-QCPP Management Consultant, Australian High Commission, Office of Works, Lae City Council, Office of Civil Aviation, Finance and Planning Dept, Telikom, Elcom, The Waterboard na ol narapela gavman dipatmen na non gavman grup husat i helpim long mekim wok bilong kamapim projek.
5. Ol papagraun bilong Ahi husat i wok bung wantaim long kamapim dispela projek.

Mi laik tok tenk yu long pipel bilong Lae na ol bisnis haus husat i stap isi na mekim wok bilong ol taim ol i wetim dispela bikpela projek long karim kaikai.

LAE SITI I MAS STAP KLIN. NOKEN TROMOI PIPIA.

Ol paitman bilong Albania bai sainim pis agrimen

Pristina, Yugoslavia: I luk olsem ol Albania paitman bilong Kosovo bai sainim wanpela agrimen bilong gutpela sindaun we bai gavman bilong Yugoslavia bai givim moa pawa i go long provins bilong Kosovo.

Kosovo provins em i asples bilong ol Albania pipel husat i laik bruk lusim Yugoslavia na kamapim kantri bilong ol yet.

Wanpela krismas i lus pinis taim pait long bruk lus i bin stat las yia na ol yangpela man bilong Albania long Kosovo i bin fomim wanpela paitlain grup we i wok long pait wantaim ol Gavman Serb ami.

Long dispela wik, ol Kosovo Liberesen Ami komanda i bin tok

orait long sainim pis agrimen wei gat plen long givim moa pawa long ol Albania pipel. Ol intenesenel komyuniti i wok long wet long kisim gutpela toktok long dispela bikos ol i laikim bai hevi long Kosovo em ol i stret.

Tu saining bilong dispela agrimen bai larim intenesenel komyuniti long go het na putim presa long gavman bilong Yugoslavia long sainim dispela pis dil. Bikos sapos nogat, ol (intenesenel komyuniti) bai go hetim ea strak long Yugoslavia.

Man i makim gavman bilong Amerika long dispela dil long sainim agrimen, Christopher Hill long dispela wik i bin toktok wantaim ol lidaman na paitman bilong Kosovo.

Wanpela bikman bilong Albania i tok bipo long ol i sainim dil, ol paitman i mas wanbel long lusim ol samting bilong pait wantaim na tu wetim tripelas krismas long redi gat bipo ol i kisim independens.

Presiden bilong Yugoslavia, Slobodan Milosevic i les long pis plen bikos em i tok 28,000 pis kipa bilong NATO we i gat 4,000 soldia bilong Amerika bai i stap insait long dispela wok bilong lukautim gutpela sindaun long kantri bilong em.

NATO grup i tok ol bai karimaut birua long balus egensim gavman bilong Milosevic sapos ami bilong em i go het long kilim dai na bagarapim ol pipel bilong Albania.



■ Samting bilong sori long en. Tupela pikinini i krai long papa bilong ol, wanpela long ol Albania lain we ol Serb soldia i bin kilim las mun. Piksa i kam long Guardian Weekly niuspepa.

Tingting long vot tupela taim long Australia i kamap olsem wanpela ribaplik

Australia: Ol pipel bilong Australia bai i vot long mun Novemba long kamap olsem wanpela ribaplik na rausim Kwin olsem het bilong Stet o gavman na putim wanpela man Australia olsem het bilong Stet.

Planti ol toktok na tingting i wok long kamap long dispela samting we sampela pipel i sapotim Kwin long stap olsem bosmeri long Stet long Australia olsem ol arapela Komonwel kantri.

Praim Minista John Howard husat i wanpela long dispela wik

bin tok bai ol i holim moa long wanpela vot long rausim o kipim Kwin olsem het bilong Stet long Australia.

Toktok bilong Mista Howard long dispela samting i bin tok egensim dispela bilong strongpela Ripabliken Pati sapota, Tresera Peter Costello husat i bin tok strong olsem bai i nogat sekonsans long ripablik sapos vot no i win long Novemba referendum

Mista Howard em i wanpela sapota long Kwin i stap olsem het

bilong Stet long Australia i tok sapos pablik i putim presa long dispela samting namba tu vot i ken kamap. Tasol em i tok bai dispela i noken kamap insait long wanpela yia.

Wanpela sevei we ol bin karimaut i soim olsem 55 pesen long pablik i no laikim referendum vot long Palamen i makim wanpela man Australia i kamap olsem het bilong Stet. Na 51 pesen i laikim Australia long kamap olsem wanpela ripablik.



■ Kwin Elizabeth 2 em i het o bosmeri long ol Komonwel kantri olsem Australia na PNG tu wantaim.

Intenesenel komyuniti bai sapotim Indonesia wantaim mani


Is Timor: Intenesenel komyuniti bai sapotim Is Timor long sait bilong mani sapos em i bruk lus long Indonesia long pinis bilong dispela yia, Foren Minista bilong Australia Alexander Downer i bin tok.

Mista Downer i tok em i toktok pinis wantaim Foren Seketeri

bilong Briten husat i tok kantri bilong em bai givim helpim long Is Timor.

Yunaitet Stets na Jemeni tu i tok ol bai givim helpim.

Mista Downer i tok bikos ol bikpela kantri i tok long givim sapot long Is Timor, bai i nogat wari long dispela samting.



■ Matmat bilong ol daiman long Is Timor. Samting olsem 200,000 pipel bilong Is Timor i bin dai long han bilong ol soldia long Indonesia stat long ol i bin tekova long ailan long 1975. Piksa i kam long Guardian Weekly niuspepa

Ripot tok tenpela krismas long 1990 i kam inap nau em hotpela yia tru long senseri

Washington, Amerika: Ol ripot i tok ol yia long 1990 i kam inap long nau em ol bin topim rekot olsem hotpela taim insait long 2,000 yias.

Wanpela stadi na wok painimaut long dispela samting i tok long las haf bilong 20th senseri, klaimet long wol i bin wok long go hot moa.

Ripot we grup bilong Raymond Bradley long Masasusets Yunivesiti long Amerika i bin karimaut i tok taim bilong hot long las haf bilong 20th senseri i no bihainim ol samting we i bin kamap long ol taim bipo.

Ripot we i kamap long

Geographical Research letters i soim olsem insait long las 900 yias, tpretraja i bin go daun 0.02 digris long olgeta 100 krismas.

Ol saveman i bin wokim stadi long ol skin bilong ol diwai, ol ais kon na ol arapela samting we i save rekotim ol senis long klaimet.

Ol bin skelim na glasim ol samting lojg tripela set bilong ol 1,000 yia diwai (ring) skin rekot long Not Amerika, noten Skendinevia, noten Rasia, Tasmani, Arjentina, Moroko na Frans.

Ol aiskon we ol bin wokim stadi long ol i kam long Grinten na Andis mauntén long Saut Amerika.



■ Biknem basketbal pilaia long Australia, Luc Longley i tromoim han long 20 mita antap long diwai. Diwai ya i sanap long 400 krismas nau. Planti lain i wok long luksave long lukautim ol diwai, wara, bus na ol samting i stap insait na ausait long ol (environmen) bikos ol i lukim wol i buigim hevi taim man i katim ol diwai samting long kamapim ikonmik developmen.

FIJI

Man Fiji yusim PNG eksperiens long helpim pipel bilong em

Fiji: Olpela Hai Komisin bilong Fiji long PNG na nau seketeri bilong Rijnel Developmen na Malti Etnik Afeas long Fiji Tomu Tuiloma i yusim eksperiens bilong em long PNG long ol rilif wok long taim bilong bikipela san long helpim wantaim ol rilif wok long helpim daunim ol hevi we taitwara i kamapim long Fiji nau. Dispela em long karimaut ol rilif wok na helpim tilim na lukautim ol rilif kaikai, klos na ol arapela samting olsem. Taitwara i bagarapim tru ol eria long wes, not na is bilong bikailan, Viti Levu. Kos bilong ol bagarap inap long \$F1.78 milien. Nainpela man i dai tu long dispela

hevi bilong taitwara. Tupela samting we Mista Tuiloma i bin lainim long stap na wok long PNG long dispela hevi bilong bikipela san long 1997 na stat bilong las yia em long kodinetim ol rilif wok wantaim helpim bilong ol ovasis Hai Komisin opis we i makim kantri na tu long tilim gut ol rilif saplai kwiktai na noken lusim ol i stap long longpela taim long ol wea haus.

Mista Tuiloma i bin joinim ministri long Janueri 1, 1999 na ol i promotim em i go long pemenen seketeri. Dipatmen ya em i wanpela long ol bikipela gavman dipatmen long Fiji we i gat moa long

260 pipel i wok long en. Em i nupela wok long Mist Tuiloma tasol em yusim eksperiens bilong em long PNG long helpim wantaim ol rilif wok long hevi we taitwara na bikipela ren i kamapim long Fiji.

I gat tupela hevi nau long fiji, wanpela em long bikipela san na narapela em hevi we taitwara i kamapim.

Hevi bilong bikipela sanm i bin stat long 1997 tasol em i go het yet long dispela taim.

PNG i givim K150,000 long helpim ol pipel husat i kisim hevi long taitwara long Fiji, Mista Tuiloma i bin tok.

RAROTONGA, COOK AILANS

Yangpela meri sumatin bilong Tahiti tokaut em gat sik AIDS

Pasin we wanpela yangpela na naispela sumatin meri Tahiti i bin wokim long tokaut olsem em i gat dispela sik nogut AIDS i bin kirap nogutim pablik bikos long Pasifik, em i tambu long toktok long ples klia long dispela samting.

Nem na stori bilong bilong Maire Bopp-Dupont husat i gat 26 krismas i bin kamap long ol niuspepa na redio bilong planti niuspepa long rijon. Mis Dupont em i wanpela sumatin long Yunivesiti ov Saut Pasifik long Fiji. I bin gat ripot olsem 11-pela sumatin long yunivesiti ya i gat sik nogut HIV/AIDS. Mis Dupont long las Disemba insait long wanpela bung bilong ol bung bilong ol niuslain i tokaut olsem em i gat sik nogut ya. Em i tok em bin kisim sik nogut ya long

boipren bilong em we em bin raun wantaim long yunivesiti long tripela krismas.

Mis Dupont i tok noken ting olsem ya ken kisim dispela sik long pamuk pasin o wokim ol wanpela nait pren tasol, nogat. "

Yu ken kisim tu long ol strongpela na gutpela prensip olsem dispela we mi bin gat na mi kisim sik," Mis Dupont i tok.

Nau em i wok strong long karimaut ol aweanes progem long daunim sik AIDS insait long Kuk Ailans. Long namba wan taim tu, em i askim strong tu ol edukesen atoriti long toktok long dispela samting insait long ol skul na givim skul long ol yangpela sumatin rot long abrusim dispela sik nogut HIV/AIDS.

KIRIBATI


Kiribati sot long wara na askim long helpim

Kiribati: Presiden bilong Kiribati, Teburoro Tito i askim Australia na ol arapela kantri long givim helpim wantaim wara bikos bikipela san i kamapim hevi long ol.

Kiribati em i stap long sentrel Pasifik na 33 ol liklik ailan we i stap long biksolwara i kamapim ailan kantri we yumi kolim long Kiribati.

Long eitpela mun nau, ol Kiribati ailan i no kisim ren na nau ol i sot tru long wara.

Presiden Tito i tok hevi long nogat wara i wok long go nogut olgeta na ol wara bilong ol i klostu pinis nau. Teti tri ol liklik ailan long Kiribati i karamapim 3.55 milien skwea kilomita solwara.



■ Eliesa Tomu Tuiloma, olpela Hai Komisina bilong Fiji long PNG na nau pemenen seketeri long Ministri bilong Rijnel Developmen na Malti Etnik Afeas long Fiji.

Laikim lo bilong wok gut wantaim ol HIV/AIDS siklain

Fiji: Wanpela rijinel woksop we i sut long sik HIV/AIDS ol bin holim long Fiji i tok em i taim nau long ol gavman long rijen bilong wokim ol lo long noken bagarapim tasol bilong lukautim long wok ples ol manmeri i gat dispela sik nogut.

Opis bilong Intenesenel Leba Ogenaisesen i beis long Fiji i tok moabeta ol gavman i mekim ol wokples i gutpela na ol man wantaim HIV/AIDS i ken wok wantaim ol arapela nomol manmeri. Na ol i ken wok i go long longpela taim ol i stap orait yet.

Progrem opisa bilong ILO, Margaret Reade-Rounds i tok

planti pipel i gat binatang bilong sik HIV na maski ol i gat 14 o 40 krismas, ol i gat save long wok na go ehtim kantri. Em bin tok i moabeta long gat gutpela plening long wokples long raits bilong ol woklain husat i gat sik HIV/AIDS bikos sapos nogat, ol wok mani bilong kantri bai pondau.

Mis Rounds i bin wokim toktok ya bihain long wanpela Pasifik Ailan meri i bin tokim konprens olsem bos bilong em i rausim em long wok bikos em gat binatang bilong sik HIV.

Meri i bin kisim sik ya long man bilong em na em lusim tu bebi

bilong em long dispela sik. Man bilong em i dai pinis na ol famili na ol arapela pikinini bilong em i lusim em na em nogat rot long lukautim em yet long sait bilong mani.

Fiji, PNG na Solomon Ailans i gat signesai long lo bilong ILO na planti Pasifik Ailan kantri i bihainim dispela long kamapim ol Leba lo bilong ol.

Tasol i nogat lo bilong noken rausim ol man wantaim sik HIV/AIDS bikos i no bin gat dispela sik yet taim ol i wokim ol dispela lo.

IS TIMOR

Australia bai autim ol ripot long Is Timor

Is Timor: Australia bai i autim long ples klia ol sikret dokumen we em bin gat long Is Timor long ol yia long 1970s. Foren Minista Alexander Downer i bin tok.

Mista Downer i bin tok bai em i kisim sampela mun long redim olgeta dokumen pepa we i stat long 1974 taim Portugal i papa long Is Timor na 1976 taim ami bilong Indonesia i bin tekova.

Em i tok em bin toksave long ol olpela praim minista bilong Australia olsem, Gough Whitlam na Malcolm Fraser long dispela samting na moa yet, Mista

Whitlam i redi long givim helpim bilong en. Ol dokumen i karamapim ol samting olsem ol kabinet pepa na ol arapela gavman rekot, na faipela nius ripota bilong Australia husat i bin dai long Balibo long Oktoba 1975.

Mista Downer i tok em bai autim olgeta dokumen bikos long dispela rot, em i fea na ol i ken glasim, skelim na holim ol open toktok long Is Timor.

Samting olsem 200,000 pipel long Is Timor i bin dai long 23 krismas ami bilong Indonesia i bin tekova long dispela ailan taim

Portugal i lusim ol. Long dispela yia, bihain long 23 yias ol apitman long Is Timor i egensim Indonesia na ol i strong long laik bruk lusim Indonesia, Presiden Habibie i tok gavman bilong em bai lusim Is Timor i go long pinis bilong dispela yia.

Long wankain taim lida bilong ol Is Timor paitman, Xanana Gusmao husat i stap long kalabus i bin holim toktok long namba wan taim wantaim ol arapela lida husat i stap insait long pait bilong bruk lus.

IS TIMOR

Ol atoriti rausim long kolhaus man salim ol bom leta na kilim dai foapela



■ Ol kot atoriti i rausim Franz Fuchs long kot long Graz, Austria. Man ya i wok long singaut bagarapim ol mainoriti o ol liklik grup bilong ol arapela kantri husat i stap long Austria. Long Disemba 1993 inap long ol plis i bin holim pasim, sasim na kalabusim em 18 mun i go pinis, em bin salim 28 bom leta i go long ol politisen, ol niusman na ol sapota bilong ol foren mainoriti grup long Austria. Las wik, em bin sanap long kot long bom leta kempem we i bin kilim dai foapela man na kamapim bagarap long narapela 12-pela pipel. Kot bilong em bai i go het yet. Piksa i kam long Guardian Weekly

LAIPSTAIL

Redim gut 2002 nesenel ileksen, ripot i tok

PETER MAIME i raitim

RIPOT bilong wanpela wok painimaut, Ejensi bilong Intanesenel Developmen bilong Australia (AusAID) i mekim i tok, PNG Ilektoel Komisin i mas redim em yet gut long 2002 nesenel ileksen.

Dispela wok painimaut we i bin lukluk moa long ol opresen na wok i save kamap long ileksen i askim olsem PNG Ilektoel Komisin i mas gat gupela sistem bilong putim ol nem long komon rol bipo long bikpela ileksen long 2002.

Dispela wok painimaut i bin kamap bihain long Ilektoel Komisin bilong Australia i bin sindaun wantaim AusAID na bin paitim toktok long glasim na lukluk long ol rot we PNG Ilektoel Komisin i ken mekim gut wok bilong en.

Tupela bikman bilong Ilektoel Komisin bilong Australia i bin mekim dispela wok painimaut aninit long lukaut bilong AusAID.

Komon rol

Ripot bilong dispela wok painimaut i tok, ilektoel sistem long PNG i nidim ol gupela luksave na eksen long stretim sampela ol wok bilong en. Em tok, ol wok nau Ilektoel Komisin i save mekim long kisim nem long ol komon rol buk i no gupela tumas na save givim planti hevi. Em i tok planti nem bilong ol vota i save paul. Sampela taim ol nem i save

lus na i no save stap long komon rol bikos planti ol dispela rekot em ol wok manmeri bilong Ilektoel Komisin i save mekim long han.

Ripot i tok, long stretim ol kain hevi bilong lusim ol nem long komon rol, em i askim Ilektoel Komisin long yusim ol mesin olsem kompyuta long oltaim stretim na rejisterim nem bilong ol vota.

Sapos komon rol i stret olgeta bai i gat gupela ileksen long olgeta hap bilong kantri. Long PNG, dispela sistem i daunim tru ol pipel long vot long pasin bilong demokratik sistem bilong gavman, ripot ya i tok.

Long bihainim ol gupela na stretpela we bilong putim nem bilong ol vota long komon rol, dispela wok painimaut i tok olsem, Ilektoel Komisin mas putim ol ful taim Provinsal Ilektoel Opisa long olgeta provins.

Ripot i tok moa olsem, ol dispela opisa mas oltaim stretim nem long komon rol insait long 5-pela yia na i no olsem nau we ol i save mekim long wan o tupela yia bipo long ileksen. Em i tok, ol Provinsal Ilektoel Opisa i mas toktok wantaim ol lain long distrik edministresen na go bungim ol viles rekota long kisim na stretim nem long ol komon rol.

Long dispela sistem bilong stretim oltaim komon rol, ol Provinsal Ilektoel Opisa i no ken kisim ol nem bilong ol vota nating long ol kankain man. Taim klostu ileksen


i laik stat, ol mas pasim komon rol buk na i no ken kisim moa nem o long wokim wanpela saplementri rol, ripot i tok.

Dispela wok painimaut tu i luksave olsem, Ilektoel Komisin long wan o tu wik bipo long ileksen i save bungim ol nem long putim long komon rol. Dispela wok painimaut i save olsem i gat lo i tambuim dispela samting tasol, ol opisa husat i wok long en i save mekim yet, maski lo i tok nogat.

Sampela ol toktok, ripot i bungim long ol Ritening Opisa o ol lain husat i save go pas long ileksen i tok, ol opisa bilong ol i save kisim ol nem long las minit long putim long komon rol. Ol i tok olsem ol i mekim dispela pasin bikos taim ol i save kisim long stretim ol komon rol i sotpela na tu ol tok pret bilong bagarapim gupela ron bilong ileksen.

Ripot i tok, aninit long Ogenik Lo bilong Nesenel na Lokol Levul Gavman Ilekten, husat man o meri krismas bilong em i 18 na antap i mas putim nem bilong em long komon rol long vot long taim bilong ileksen. Tasol dispela wok i no save kamap long olgeta yia. Em i tok, ol komon rol ol i redim long wanpela ileksen em ol i save larim i stap nating inap long foapela yia olgeta na taim i klostu tru long narapela ileksen, Ilektoel Komisin i laik traim long stretim gen.

"Wanpela bikpela hevi long komon rol em ol kankain nem nating i save pulap. Dispela em i



• Wanpela vota long ples bilong vot long Garden Hills setelmen insait long NCD i putim vot pepa i go insait long balot bokis.

no nem tru bilong ol vota tasol ol man i save pulapim nating long buk," ripot ya i tok.

Em i tok, dispela ol giaman nem i save kam stret long ol ples, na sampela taim Ilektoel Komisin i save kisim long han bilong ol kendidet husat i resis long ileksen. Em i hat long ol Ritening Opisa long sekim ol dispela nem sapos em ol nem tru bilong ol pipel husat i stap ples o nogat. Olsem na taim bilong vot, sampela lain i save givim vot long ol dispela giaman nem.

Dabol vot

Dispela ripot tu i tok olsem, dabol vot long taim bilong ileksen em bikpela tru. Dispela wok painimaut i luksave olsem planti lain i bin tok olsem dispela ink o pen ol

ileksen opisals i save putim long han bilong ol vota i no wok gut.

Planti lain i tokim dispela tim husat i bin mekim wok painimaut olsem, ol pipel i save rausim dispela ink ol ileksen opisals i save yusim long ileksen long wara bilong muli o ol blis wara bilong wasim ol klos. Ripot i tok olsem, sapos dispela ol toktok i tru, dispela em pasin nogat na kilim indai mining bilong fri ileksen.

Ripot ya i askim ol lain long Ilektoel Komisin long sekap long dispela ink gen na sapos ol toktok ya i tru, ol i mas stretim hariap. Em tu i askim sapos Ilektoel Komisin i ken yusim wanpela ink ol i bin yusim long ileksen long kantri India.

Ripot i toktok strong sapos inap long Ilektoel Komisin i ken yusim ol ID poto bilong ol vota wantaim ilektoel komon rol. Em i askim Ilektoel Komisin long toktok strong long gavman long mekim lo long kamapim sampela kain senis bai ol pipel i no ken trik na vot planti taim.

Ilektoel Komisin wetim tok orait

Dispela ripot wantaim sampela moa askim i bin go pinis long ol lain long Nesenel Plening Opis long lukluk long en. Sapos ol i lukim na tok orait long PNG Ilektoel Komisin long go het na stretim sampela samting ripot ya i tok long en, bai Ilektoel Komisin na AusAID opis long hia bai lukluk long sait bilong mani.

Ilektoel Komisin wantaim AusAID PNG bai askim bikpela opis bilong AusAID long Canberra, Australia long kisim sampela sapot mani long stretim na sapotim ol wok bilong Ilektoel Komisin.

Dispela agrimen o kontrak bilong prosek bilong Ilektoel Komisin i mas gat luksave bilong gavman bilong PNG na Australia. Sief Ilektoel Komisina. Reuben Kaiulo i amamas long dispela wok painimaut. Em i tok olsem sapos ol samting i go stret na ol i kisim mani long kirapim wok bilong ol, bai ol i statim wantu long stretim sampela ol hevi ripot ya autim.



• Seif Ilektoel Komisina, Reuben Kaiulo (lephan) i givim ol ileksen pepa bilong 1997 long olpela Gavana Jenerel, Sir Wiwa Korowi long sainim.

Pikinini save senisim laip bilong manmeri

MASTA WAI i raitim

TAIM ol pikinini i save stap wantaim yumi long haus, yumi save bikmaus na hatim ol long harim tok na lusim pilai, waswas na sindaun isi long haus long kaikai na go slip hariap. Dispela samting em olgeta de yumi ol papamama i no inap abrusim bikos olgeta de bai mipela i mas toktok long pikinini, hatim ol, paitim ol sapos ol i bikhet na sampela taim yumi i pilai wantaim ol pikinini bilong yumi insait o arere long haus bilong yumi.

Taim ol pikinini i liklik bebi yet olsem 1, 2 na 3 krismas, yumi save karim ol raun na pilai wantaim ol long haus. Taim ol i kra, yumi save olsem ol i laikim kaikai o dring. Sampela taim ol i kra bikos ol pispis o toilet long nepkin o trausis bilong ol. Olsem na yumi papamama i save kisim tingting hariap na stretim dispela hevi bilong ol. Sampela taim pikinini i kra tumas, yumi traim long sekim ol nogut sampela hap skin o bodi bilong ol i sua o ol i gat sik samting. Orait yumi hariap kisim ol i go long haus sik bai ol nes na dokta i sekim na givim marasin stret bihainim skel bilong ol liklik pikinini.

Ol pikinini em wanpela samting insait long laip bilong yumi olgeta manmeri bilong graun. Ol i ken mekim tingting na pasin bilong papamama i senis. Ol i ken senisim tru laipstail na sindaun bilong yumi ol papamama na yumi i ken pilim tru wanem kain senis i kamap long laip bilong yumi bikos pikinini i kamapim dispela senis.

Taim yumi bin yangpela singel man, yumi save mekim planti kain kain samting. Yumi save go raun long pilai spot, raun lukim ol arapela poroman na slip wantaim ol sapos ples i go tudak, raun long pati na dring bia, raun long balus i go long narapela provins na kam bek. Taim yumi yangpela, yumi i olsem turis stret bikos olgeta hap kona em yumi i ken go na nogat samting bai stopim yumi.

Mi bin lukim ol yangpela brata bilong mi i bin kam stap wantaim mi tupela krismas i go pinis na taim ol i go bek long ples, mi harim nius olsem ol i marit. Na mi ting tingim bek long amamas bilong ol long raun i save moa yet na stail bilong ol long bilas na raun long disko tu i save moa yet. Bikos bikipela as bilong dispela em ol i laik painim poroman tru bilong ol we i gat amamas lewa bilong ol i mas bruk tru long en na ol i mas pilim olsem dispela poro em bilong mi stret.

Taim yu yangpela man o meri



i raun raun i go na bungim poroman o poromeri bilong yu na laik i pas na yutupela i laik stap wantaim, bai yutupela i ting olsem mama i karim yu long dispela graun long kisim dispela samting stret. Nogat narapela samting moa bai bagarapim laip bilong yutupela bikos yutupela i laikim narapela moa yet na ol arapela manmeri o samting em i no bisnis bilong yutupela. Olgeta amamas em bilong yutupela yet bikos i nogat narapela manmeri moa long dispela amamas na laip bilong yutupela.

Taim dispela senis i kamap we meri i stat long wari bikos sampela samting em i save lukim i no bin kamap, bel bilong man tu bai surik na pret bai kamap. Tasol olgeta de tupela i wok long toktok long tupela yet long dispela hevi i go, bai hevi na wari i wok long go daun liklik liklik na tingting bilong sindaun isi na kamapim sampela gutpela samting bai i kamap. Man bai i tingting long em i mas painim wok, o stat long katim gaden. Meri tu bai stat tingting long bihainim lek bilong man na tupela i mas wokim gaden na planim kaikai

we em i mas kisim i go long maket na painim liklik mani. Na em i mas stat long holim strong sampela mani i stap long paus. Bipo taim tupela i gat mani, bai tupela i mas raun olsem yangpela yet long stua na baim loli wara, kaikai long stua, baim ol stail bilas, bilas gut rum bilong tupela i stap klin moa na kain olsem. Tasol taim meri i bel, bai dispela samting i pinis bikos dispela samting long bel bai senisim dispela stail bilong tupela.

Taim pikinini i kamap, em i olsem wanpela king bikos olgeta wok em papamama i mas mekim long stretim laik na sindaun bilong pikinini we em i mas kisim na amamas olgeta de.

Meri i luksave olsem em i mama na man bai luksave olsem em i papa taim pikinini i kamap na sindaun namel long tupela. Dispela laik man na meri i gat long narapela long bipo taim yangpela bilong tupela bai bruk na igo long pikinini we em i bungim dispela amamas bilong papa na mama wantaim.

Olgeta manmeri i save laikim long lukim ol pikinini bilong ol i lainim long soim gutpela pasin,

harim tok na sindaun isi. Olsem na ol papamama yet i save go pas long skulim ol pikinini long kamap wantaim ol dispela samting bai em i ken groa wantaim ol stail na pasin papamama i laikim.

Taim pikinini i kamap 5 o 6-pela krismas, papamama i stat long pasim tok long salim em i go long skul. Na taim pikinini i go long skul, bai papamama i olgeta de kisim em i go lusim long skul na go bek kisim em long taim skul i pinis. Bai ol i mekim olsem i go inap em bikipela na go long bikipela klas olsem gret 3, 4, 5 na 6 bai ol i larim ol yet i go long skul. Long taun, papamama i save kisim ol i go long skul sapos ol i gat ka long go lusim ol na kisim bek ol.

Long ovasis kantri, planti manmeri i save nogat pikinini na ol i save baim long bikipela mani tru long ol papamama bilong pikinini. I save gat planti bikipela lo long dispela na ol manmeri i laik baim pikinini i mas bihainim olgeta kain kain lo pastaim long ol i ken kisim pikinini bilong narapela manmeri na lukautim. Ol dispela kain famili, ol i nogat pikinini na ol i save oltaim raun na sindaun

wantaim wari taim ol i lukim arapela manmeri wantaim pikinini bilong ol. Taim ol i marit 10-pela krismas o moa tasol nogat pikinini, dispela wari i save kamap.

Tasol long PNG, yumi gat pasin tumbuna bilong yumi yet we narapela kandre meri o kandre man o susa brata i save givim pikinini long narapela sapos ol i nogat pikinini.

I save nogat planti toktok o planti lo bilong bihainim bikos yumi save olsem pikinini i stap namel long famili bilong yumi yet na em bai bikipela na helpim yumi olgeta.

Insait long bikipela buk Baibel, tok i stap olsem pikinini em bikipela blesing God i givim yumi ol papamama na ol manmeri bilong graun.

Olsem na yumi mas amamas na lukautim gut ol na skulim ol long gutpela pasin bai ol i kamap gutpela bikipela manmeri long bihain na stap gutpela laip.

Pikinini em piksa o mak bilong famili. Sapos nogat pikinini, dispela man na meri i nogat strong o tupela i nogat gutpela luksave tumas long ai bilong komyuniti.

WANTOK spots wiken

Orogen i sapatim skul soka long Mosbi

SKUL SOKA RIPOT

SKUL SOKA long Pot Mosbi i makim Orogen olsem wanpela bikpela sponsa bilong em long dispela yia.

Presiden bilong Skul Soka Joe Heenan i tokaut long dispela olsem Orogen i baim aut kos bilong haiarim ol oval long Sir John Guise stadium. Coca Cola husat i save sapatim soka i les long baim graun tasol nau Orogen i helpim Skul soka ya.

Heenan i tok em i amamas tru olsem na ol eksekutiv i

senisim nem bilong kompetisen i go olsem Orogen Skuls Soka lig.

Bipo pe bilong haiarim graun i stap long K3,700 tasol long dispela yia pe i go antap long K12,000. Na ol i ting olsem long yia 2000, pe bai go antap olgeta long K21,000.

Heenan i makim maus bilong 6,000 ol rejista pilaia long tok tenk yu long Orogen long sapatim skul soka.

Skul soka bai stat long dispela wiken. Olsem tim bai mas redi long Sarere long Sir John Guise stadium.

Tigers i autim NGI long fainel

POM MENS SOFBAL RIPOT

TAUBMAN Tigers i mekim bikpela nius tru taim em i autim wanpela biknem tim, NGI Taubar 8-6 long bikpela game long Sarere long Bisini.

Na dispela tu em i las gem bilong sisen we ol tim i resis long holim strong posisen bilong ol long poin lata.

Insait long arapela gem, Elcom winim Dolphins 2-0, Brown Eagles i laki long wanpela poin egens long AB Bears, Hawks i daunim strong bilong FAI Manalos 3-2 na MSC i holim namba faiv posisen bihain long em i wilwilim stret Malangan 21-3.

Arapela tim husat i holim posisen bilong ol em Gazelle (34), Brown Eagles (32), Elcom (32) na Manalos (29).

Dispela gem namel long NGI na Tigers i gutpela stret. Ol NGI i no westim taim long rekotim tupela poin long namba wan ining. Nigel Tata i opim rot taim em i paitim wanpela hom ran long go pas long skoa 1-0.

Orait Blais Paivu Jnr i reko-

tim namba tu poin bilong NGI taim em i painim wanpela gutpela bal na abrusim seken bes pilaia bilong Tigers Edward Remi.

I bin gat liklik ren orait Tigers i bekim long dispela ining. Francis Diap na Patrick Gabore i wokabaut i go long namba wan bes bikos pitsa bilong NGI Michael Pukai i no pits gut. Olsem na ol i stilim bes na kam hom long level skoa 2-2. Orait Steven Vui tu i kam hom long surikim skoa i go long 3-2.

Na long namba tri ining, skoa i stat long ran olsem wara. Insait long dispela ining yet, Tigers i rekotim 4-pela ran i kam long Ken Kamaniel, Francis Gebore, Paskalis Pina na Diap.

Na 4-pela ran bilong NGI i kam long Graham Paivu, Tata, Alois Odis na Nason Albert.

Ol arapela skoa long Sande i sanap olsem Dolphins winim Malangan 14-6, Bears winim NGI 4-2, Elcom autim Tigers 3-2, Gazelle winim MSC 4-3 na Eagles bekim dinau na wilwilim stret Manalos 13-5. inis

Fainel faiv redi long brukim bun

NCD PSSA RIPOT

HENRY MORABANG i raitim

SEMPION tim bilong las yia, Air Niugini bai nogat sans long winim bek taitel bikos em i aut long fainel bilong NCD Pablik Sevan Soka kompetisen.

Fainels bilong PSSA bai stat long dispela wiken.

Sekretari bilong PSSA Bede Tomokita i tokaut olsem bai i gat 5-pela tim

long wanwan divisen long pul wan (men na wimens) na pul tu (men na wimens).

Tomokita i tok olsem ol tim long pul wan (man) em NPF, Works, NCDC, Habours, NSO na long wimens divisen em Defence, Telikom, NCDC, Air Niugini na Education

Na long pul tu, (man) Police, Elcom, Defence, POSF na Cellnet na long wimens divisen Cellnet, Police, NCC, Health na Elcom.

Tomokita i tok tu olsem long resis long painim

maina primia, tupela top tim bilong man long pul wan NPF na Pul 2 Police bai salens long painimaut husat bai makim PSSA long nesenel klap sempionisip.

Dispela tu bai wankain long resis bilong ol meri, we pul 1 Defence bai salensim Cellnet long painim husat bai bai makim PSSA.

Sekretari i tokaut olsem NPF husat i kisim namba wan posisen i soim tru olsem ol i gat bikpela laik long winim primiasip ya.

Tupela wik i go pinis, NPF i sindaun long namba foa ples, tasol ol top tri tim i no holim strong posisen olsem na em i kisim ples.

NCDC husat i gat tingting long winim maina primia taitel i bagarap bihain long Air Niugini i pilai strong na dro 1-1.

Insait long 18 minit bilong pilai, Oni Maso kikim dispela gol long givim sampela laip long NCDC. Tasol ol i no was gut na Brian Lapan i bekim dispela gol.

Boi Manus Lapan em i pilai winga i kisim wanpela gutpela bal i kam long straika bilong en, Glen Ross long pairapim umben.

Works husat tu main primia las yia i no gat sans long difending taitel na i lusim long NPF na Police long painim aut long dispela wiken.

Skoa bilong ol arapela gem em NPF i winim NSO 2-0, Education dro wantaim Harbours 1-1, Telikom dro wantaim BPNG 0-0, Air Niugini daunim PMGH 3-0, DCA nekim UPNG 3-0, NSO autim BPNG 2-1, Telikom winim NBC 2-1 na NPF winim DAL 4-2.

Long wimens divisen, Works autim DAL 2-1, Education wilwilim Harbours Board 6-0, NBC winim Transport 2-0, UPNG winim DCA 4-0, NBC dro wantaim Defence1-1, Diwai autim Transport 1-0 na Teachers dro wantaim Telikom 1-1.



• Mama long Works ino wari long bikpela Diwai i blokim rot. Em i givim tasol na tim i win 2-1. Foto: Ivan Bayagau.

Ol mama i gat kik na stail

RABAU SOFBAL RIPOT

BROWN Eagles na C-Vui i kamap olsem nupela king na kwin bilong sofbal long nupela asosiesen, Rabaul Amata Sofbal Asoseisen las wiken.

Ol boi long Matupit i sakim strongpela salens tru i kam long Talili Gazelle long winim dispela taitel.

Em i namba wan sofbal grenfainel bihain long bikpela bagarapl bilong mauten paia i bagarapim olgeta samting long Rabaul taun.

Brown Eagles i win 1-0 long winim Rabaul Distrik Kap.

Tasol gem bilong ol meri i gutpela

tru. Bikos bihain long olgeta ining, tupela tim i dro 7-7. Na aninit long lo, ol i mas pilai tupela ining long painim husat i ken skoa na win.

Olsem na taim ol i larim gem, C-Vui i strong tru na winim ol Tigers 9-7 long kamap kwin.

C-Vui em wanpela strongpela tim na planti sofbal lain long Rabaul i save em i tim bilong ol mama ya. Tupela tim wantaim i strong na bihain long namba siks ining, skoa i sanap olsem Tigers 7 na C-Vui 3.

Ol mama i no wari bikos ol i gat eksperiens ya. Ol i yusim kain ol eksperiens na rekotim 4-pela arapela ran long dro wantaim Tigers,

7-7 long fultaim.

Taim ol i pilai long ekstra taim, C-Vui i yusim eksperiens bilong ol long win 9-7.

Tigers i gat ol pilaia i kam long Burma Road olsem Mary Barovan, Takunia Pinau, Muruna Tamlik, June Mano na Ron Stanley. Ol dispela pilaia i rekotim namba wan faiv ran bilong Tigers.


Arapela tupela ran i kam long June Mano. Na dispela i helpim stret ol Tigers long skoa 7-3.

C-Vui i rekotim ol ran bilong em long namba tu na foa ining. Ol ran ya i kam long Kinavai Maira, Reddie Wamal na Minia Kepas.

Ol sapota i guria stret long lukim wanpela beta bilong C-Vui i paitim bal long bringim em yet wantaim tupela rapela ran olsem Mary Waigoga, Kinavai na Maira i kam hom. Na Reddie yet i levelim skoa 7-7.

Orait Mary na Marian i paitim tupela bal long surikim skoa i go long 9 long winim taitel.


Na long gem bilong ol man. Gem ya i strong tru na nogat wanpela skoa i kamap. Olsem na long namba faiv ining, pilaia bilong Brown Eagles Leonard Kavakava i paitim wanpela gutpela bal long kam nom. Na dispela em skoa i bringim i go fultaim.



• Bodalain tim bilong Kaugere husat i save resis long Saut Setelmen tas ragbi.



• Antap: Steelers tim husat i save pilai long Saut Setelmen ragbi tas long Sir Hubert Murray stedium.



• Aninit: Sori susa, em bal bilong mi. Tupela meri i traim resis long kisim bal long Praivet Kampani net-bal resis long Pot Mosbi.

WIKEN SPOTS EKSEN

• Antap: Pilaia bilong Negiti Bears i kisim taim stret long han bilong ol boi Henz long bikpela gem bilong Okkaihens ragbi lig las Sande.

• Lephon: Pilaia bilong Works i trikim birua bilong em long wangepela kik resis bilong Pablik sevan soka las Sande long Pot Mosbi. Works i win 2-1.

• Aninit: Pilaia bilong Warriors i autim bal bipo long mangi Panthers i holim em long Gordon Tas ragbi lig long Mosbi. *Ol foto: Ivan Bayagau.*



Post Courier i winim taitel

PRAIVET KAMPANI NETBAL RIPOT

POST COURIER em i kamap olsem kwin bilong Praivet Kampani netbal kompetisen long Pot Mosbi.

Ol meri long Lawes Road i autim tiket bilong SP Holdings 24-20 long holim dispela taitel namba foa taim olgeta.

Olpela biknem intanesenel Lydia Veali i go pas long tim. Lydia em i kepten na i pilai long suta posisen we em i skorim planti poin stret long helpim Post Courier long win.

Tasol dispela win bilong Post Courier i no kam isi. Ol i pilai strong tru bikos SP Holdings i putim gutpela salens stret long winim dispela taitel tu ya.

Midkot pilaia bilong Post Mary Alu, Eunice Sea na Janet Daniel i kamapim strongpela pilai long givim hattaim long difenda bilong SP Holdings.

Ol difenda bilong SP Holdings Jenny Kaipu na Jenny Jenkins tu i gat ol hevi bilong bikos ol i painim hat tru long banisim Veali long putim gol. Veali i putim 10-pela gol long namba wan hap bilong pilai. Skoa long haptaim em 14-9.

Long namba tu hap, Damarish Malagu, Raka Nou na Okera Amini i stat long kamapim gutpela pilai.

Olsem na ol Post Courier i laik senisim gem plen bilong ol na pilai isi. Na dispela tingting long pilai isi i karim kaikai stret. Olsem na skoa i sanap 24-20 long fultaim.

Post Courier i putim 10-pela poin na SP Holdings i putim 11-pela poin long bungim olgeta skoa long fultaim.

Kepten bilong Post Courier Veali i tok olsem ol meri bilong em i guria stret na lusim planti ol gutpela bal i go long ol birua. Tasol em hepi long difens bilong tim.

Kila Gei bilong SP Holdings i tok em i amamas tru long tim bilong em. Ol i putim gutpela gem stret egens long Post Courier. Tasol em i amamas long tim i lus long 4-pela poin tasol 24-20.

PRL RIPOT

HENRY MORABANG i raitim

SIAMAN bilong Stanley Haru i makim tude olsem las de bilong ol klap long givim ol ripot i go long ol eksekutiv bilong em.

Em i tok tude (Mas 11) i mas givim olgeta ripot bilong klap AGM, ripot bilong fainens, ripot bilong junia na referi, afiliesen na spon-

sasip agrimen i go long PRL Bot.

Haru i tok sapos ol klap i no bihainim ol dispela toktok bilong eksekutiv bilong PRL, ol i save long wanem samting bai kamap long ol. PRL bai rausim tu poin bilong ol.

Ol klap i no givim minit bilong AGM bilong ol em Brothers, Defence, Magani, Royals, Hwks, Kone Tigers, Gulf-Wests, Gerehu Yunaited, Paga Panthers.

Ol klap i no givim ripot bilong

presiden, referi na junior em Brothers, Gerehu, Paga Panthers,

Referi na Junia ripot na fainens em Brothers, na referi em Defence, junia em Kone Tigers na Gulf-West.

Na klap i no baim afiliesen em Brothers, Royals, Souths, Tarangau, Gulf-West.

Ol klap i no givim referi na Juniors na sponsasip agrimen ripot em Brothers, Magani, Gerehu Yunaited, Soths na Hawks na junia konstitusen em Brothers, Dobo Warriors,

Defence, Hawks, Gerehu United, Souths na Hawks.

Haru i tok strong olsem ol klap i mas save olsem dispela yia em taim bilong skelim ol klap husat bai stap yet o nogat.

Bikpela samting ol klap i mas save olsem neks yia 2000, PRL bai autim foapela klap long bringim namba bilong klap i kam long 10. Olsem na nau pasin ol klap i mekim ya, em PRL bai putim long rekot na skelim taim sisen i pinis.

Resis long gren fainel spot

LAE SOFBAL RIPOT

FRANCO NEBAS i raitim

RESIS long gren fainel spot long Lae softbal resis bai stat long dispela wiken long Sir Ignatius Kilage stadium.

Ol tim husat i kwalifai na bai traim strong long winim spes long gren fainel. Long B gret divisen (man) Karanas bai salensim Brown Eagles na Aviat bungim Burma Raiders Elcees (BRE). Wina bilong Karanas/Eagles bai go stret long gren fainel na lusa kisim wina bilong Aviat/BRE na lusa hangamapim su.

Na long wimen A gret, Bismark bai skelim strong bilong Manalos, NGI Telikom bai pilai egens long Karanas. Wina bilong Bismark na Manalos bai sambai long gren fainel

na lusa traim gen wantaim wina bilong Telikom/Karanas.

Long B gret divisen (meri) Karanas bai bungim Manalos long painim wina bilong namba wan spes long gren fainel na lusa kisim wina bilong NGI Telikom na Aviat Jets. Insait long resis bilong ol man, A gret, bai i gat wanpela strongpela pilai stret namel long Brown Eagles na Karanas, na tu Manalos wantaim Aviat. Wina bilong Eagles na Karanas bai go stret long gren fainel na lusa bai gat namba tu sans gen long bungim wina bilong Manalos na Aviat Jets.

Eagles/Karanas gem em bai wanpela gutpela gem stret long wanem dispela tupela tim i gat ol rait lain tasol husat i save mekim nem long Lae sait na tu Papua Niugini bai soim stret ol stail we i lukim ol i namba wan pilaia long softbal.

Dispela i no nupela taim dispela tupela tim i bung, nogat ol i bin bung tupela taim pinis long komptisen na ol i save pinis long ol stail pilai bilong ol yet. Tu tupela i nambawan tim long las sisen salens long gren fainel.

Long ol dispela bung bilong tupela Eagles i soim ol pinis strong bilong ol na autim tiket bilong Karanas.

Tasol ol Eagles noken ting olsem bai ol i win tasol olgeta taim sampela taim wok i save rong ya, em sapos Karanas i stretim gut ol yet long ol liklik asua ol save mekim olsem long in holim bai gut na lusim ol runas (betas) stilim bes.

Eagles i bin kisim tupela wiken malolo na dispela i ken helpim ol gut long sait bilong fitness we Karanas ino nogat. Dispela em wanpela rot tu we i ken helpim


Eagles long win.

Nogat em stap long han bilong ol pilaias yet olsem, tok i stap pinis, wanem tim i mekim liklik asua bai kamap wina long de.

Ol lain husat bai kisim fil long Sande em Eagles, John Tume, Thomson Tavor, Thomas Buasi, James Taule, Kepas Taule, David Maire, Nick Paivu, Isimel Valuta, Tagaga Ngaungau na lapun yet Enoch Darius long kam insait olsem DH o pin hita.

Long kem bilong Karanas em, ol yangpela intanesenel pilaia yet, Simon Matane, Jr Elikis Eludai, Peter Kisakao bai go pas wantaim helpim kam long olpela intanesenel Allan Taule na Samson Taken.

Tupela siat wantaim i wankain long strong bilong paitim bai na tu insait long infil eria. Em nau i stap long han bilong ol yet nau.



• Brata ya i taitim bun long paitim bal long Pot Mosbi softbal asosiesen resis long las wiken.

EHP gavana sapatim Charity Lig salens

CHARITY RAGBI LIG RIPOT

GAVANA bilong Isten Hailens Damson Lafana i sapatim Charity Ragbi Lig Salens we i laik kamapim mani long sapatim ol haus kalabus insait long hailens.

Dispela Charity Lig Salens em FORD wanpela nan-gavman oge-naisesen i go pas long en long sapatim dispela salens. Bipo nem bilong kompetisen ya em Hailens

Hero Ragbi Lig tasol nau em i senis long Charity Ragbi Lig. Dispela kompetisen em bebi bil' ig Alphonse Pu husat i menesing dairekta bilong FORD.

Las yia planti ol inta siti tim i yusim dispela kompetisen long redim ol yet long kompetisen we olgeta tim bilong hailens i go long fainels.

Pu i tok las yia klostu olsem K60,000 em i wokim na givim i go long ol provins we i kisim bagarap

long bikpela sans. Dispela yia kompetisen i tingting long wokim mani na givim i go long haus kalabus long ranim ol program bilong ol. Lae Bombers husat i autim tingting pinis long stap insait long kompetisen. Na mani em Bombers i wokim long dispela kompetisen bai i go long Buimo haus kalabus.

Insait long wanpela pas i go long FORD, Gavana Lafana i tok amamas tru long Alphonse Pu

long kamapim dispela tingting long sapatim program bilong ol haus kalabus.

Lafana i tokim FORD olsem em bai givim skel bilong em taim em i gat mani long sapatim Charity salens.

FORD i askim olgeta gavana insait long hailens long givim K10,000 long sapatim dispela kompetisen. Nau yet Gavana bilong Sauten Hailens Anderson Aiguru i amamas long kompetition

na em i laik dispela kompetisen i mas stap yet. Gavana bilong Wesien Hailens Fr Robert Lak tu i amamas bikos tupela tim bilong em Waghi Tumbe na Mt Hagen Eagles i pilai long fainels ya.

Tupela komanda bilong Haus Kalabus Samson Jaro bilong Buimo na Joe Karo bilong Barawagi long Simbu i amamas tu long dispela tingting long pilai ragbi na sapatim program bilong haus kalabus.

PMSA i redi long 99 sisen

PMSA RIPOT

HENRY MORABANG i raitim

POT MOSBI Soka Asosiesen (PMSA) i oraitim pinis nem bilong ol klap long kik insait long wanwan divisen long dispela yia.

Insait long primia divisen, 5-pela tim long namba wan divisen i joinim primia long dispela yia. Ol tim ya em Cosmos, Ela United, Simla, Normads na Kurti Andra.

Arapela tim long primia divisen i sanap olsem Yunivesiti, Rapatona, Guria, Defence, Babaka, Tarangau, Blue Kumuls, Telikom, PS United, Adau.

Tim long namba wan divisen em Hoods, Sobou, GFC, NISCO, Pom United; M Gaiandu, Cyclone, Wanzesi, Togelu, CT Kings, Keweh, Bau Futz, Bao Mitas, SPB, YMZ, Dobo Omens, Tawala na KTS

Sekretari bilong PMSA William Vui i tok olsem Bau Mitas, SPB, YMZ, Bau Futz na Dobo Omens i stap long seken divisen tasol nau i stap long namba wan divisen.

Ol tim bilong seken divisen em Don Bosco, Mukaso, Fisika, Kutu, NCDC, Mibubaewa, Muiah, Waigani Heights, Buresong na Ilimo Bombers.

Na wimens (divisen wan) em Telikom, Yunivesiti, TST Stars, Normads, Wanzesi, Bomana Blue Kumuls, Defence, Togelu, Guria, PS United, Tarangau na Sobou.

Na wimens (divisen tu) Naniu, Keras, Falcons, CT Kings, Pom

United, Cyclone, Blue Kumuls, Murat, GFC, Adau na Morata Sisters.

Vui i tok ol klap husat i gat tingting long stap long kik resis bilong dispela yia i mas baim K350 afiliesen fi na K50 long tim rejistresen.

Sekretari i tokaut olsem de bilong rejistresen bilong ol pilaia bai pas long Mas 31 - wan wik bipo long sisen bai stat. Em i askim olgeta pilaia long wokim

ID kat bilong ol long soim olsem ol pilaia bilong PMSA.

Rejistresen fi bilong ol primia pilaia em K25 na ol arapela divisen em K20 na ol ande. 19 pilaia em K15.

Tresera bilong PMSA Enoch Pokarop i laik tok klia olsem dispela tim long divisen i no fainel.

Ol tim ya bai mas soim tru olsem ol i gat mani long ranim klap na ol arapela wok, em PMSA bai kisim.

PMSA bai i no kisim klap husat i nogat mani we planti klap nau i no baim rejistresen na tu afiliesen fi.

Pokarop i tok dispela ol senis i bihainim nupela straksa na konstitusen em jenerel miting long Mas 20 bai oraitim.

Tresera i askim ol sapota, opisel na pilaia olsem ol i noken ting lista bilong tim em i fainel.



• SUSA bilong Edukesen i banisim birua bilong em DAL taim tupela resis long kisim bal long pablik sevan soka resis.

Tripela tim i no bihainim afiliesen

RABAUl LIG RIPOT

TRIPLELA klap Storms, Souths na Yunaited i no bihainim gut rot bilong pulapim fom bilong afiliesen i go long PNG Ragbi Futbal Lig. Presiden bilong Rabaul Kelly Lyen i tokim Wantok olsem em i laik tripela klap ya i mas pulapim fom na salim kwik i kam long PNGRFL hetopis long Pot Mosbi.

Lyen husat i stap nau long Plis Koles long Bomana long mekim wanpela kos i mekim dispela toktok long ol tripela klap ya i mas hariap wantaim fom bilong ol.

Long semtaim tu, Lyen i tokaut olsem Rabaul Ragbi Lig bai statim pri-sisen bilong em long dispela wiken.

Ol klap husat bai stap insait long pri-sisen em Royals, Diggers, Muruks, Balanataman na Cowboys.

Em i tok sapos tripela klap ya i hariap na salim fom long bipo long Fraide, ol bai sans long pilai. Lyen i tok sapos wanem klap i no hariap, na PNGRFL i no kisim afiliesen fom bilong ol bipo long dispela Fraide, ol bai aut. Presiden i tok tu olsem Yama Sekyuriti Kampani brens long Is Nu Briten i givim K2,500 olsem prais man wantaim wanpela bikpela kap i karim nem bilong Yama.

Em i tok wanem tim i win bai kisi K1,000 wantaim Yama kap. Ol arapela mani em ol bai givim i go long ol arapela tim husat i stap insait long pri-sisen resis.

Dispela resis bilong pri-sisen bai ran inap tripela wik bipo long sisen propa i stat long Epril 11 semtaim long namba wan raun bilong inta siti kompetisen.

INGLAN bai holim Wol Kap ragbi lig long yia 2000

WOL LIG RIPOT

BIKPELA miting bilong Ragbi Lig Intanesenel Federesen (RLIF) i oraitim pinis Ingran olsem ples 2000 Wol Kap ragbi lig bai kamap long en.

Dispela miting i wok long go het nau long Sydney, Australia. Miting ya i stat long Mande na bai pinis tomoro.

RLIF i givim dispela tonamen i go long Ingran las yia tasol Saut Afrika tu i tingting long salim aplikesen long traim holim dispela tonamen. Tasol bihain ol i senisim tingting na i no givim aplikesen.

"Ol i givim tonamen i go long Ingran bikos em i gat moa mani. Na tu planti ol kampani i sapatim dispela tonamen," namba tu siaman bilong RLIF Dave Callaghan i tok.

Wok redi bilong 2000 ragbi lig tonamen i go het na tupela bikman Neil Tunnicliffe na Sir Rodney Walker i amamas tru olsem RLIF i givim OK long Ingran.

France bai holim wanpela pul game na ol arapela pul gem bai kamap long Ingran, Scotland, Ireland na Wales. Ol gem ya bai kamap long ol bikpela siti olsem Cardiff, Dublin, Endinburg na Glasgow.

Bai i gat liklik salens long kantri olsem Itali, Lebanon, Morocco, US, Canada na Japan long painim aut husat tru bai pilai long Wol Kap.

Lebanon, Itali na Morocco bai resis long Mediterranean Kap kompetisen we France ragbi lig i go pas long en.

Ol 15 tim husat i gat nem pinis em Ingran, Scotland, Wales, Ireland, Australia, Nu Silan, France, PNG, Nu Silan Maori, South Africa, Tonga, Fiji, Westen Samoa, Rasia na Cook Ailan.

RLIF i oraitim pinis Raus olsem nupela memba. Na tupela arapela kantri i kisim membasip em Morocco na Japan na USA na Canada i kisim honarari membasip.

Poro em nupela sempion bilong pri-sisen

LFA SOKA RIPOT

FRANCO NEBAS i raitim

PORO em nupela sempions long Lae Futbol Asosiesen (LFA) pri-sisen kap long dispela yia. Ol i bin soim moa strong taim ol i autim Bara 3-2 las Sande long winim dispela taitel.

Dispela tu em nambawan taim bilong Poro long winim wanpela taitel long LFA bihain long 9-pela yia taim klab i joinim dispela kompetisen.

Poro tu em ol i stap insait long resis bilong hailens soka klab resis we ol i mekim gut na kwalifal long stap long fainels. Dispela win bilong ol las wiken i hapim tru spirit bilong ol pilaia redi tasol long fainels bilong Hailens Soka Kap.

Long fainels bilong LFA las

wiken ol i bin kilim skin stret long Sarere. Ol i wip wantaim Topicks long mesa semi fainels bipo i go long gren fainel. Ol i autim Topick 5-3 long kwalifal long gren fainel long Sande.

Long arapela mesa semi fainels namel long Blue Kumuls na Bara long Sarere i bin gat sampela liklik hevi taim skoa bilong tupela i long Sande moning we Bara i soim moa strong na rausim trasis bilong Plisman 2-0 long bungim Poro long gren fainel.

Blu Kumuls i kisim namba tri ples bihain long fofitim Topick bihain long ol i no kamap long fil.

Gren fainel namel long Poro na Bara i bin wanpela strongpela gem stret we mekim ol sapota i no sindaun gut. Tupela sait wantaim i bin putim strongpela pilai wantaim ol gutpela stail. Tupela i

bin pilai strong i go na long wanpela taim tupela wantaim i dro 2-2.

Poro i no westim taim long namba wan hap taim flanka Samson Kowa i krosim wanpela gutpela bal i go insait long gol eria bilong Bara we i painim stret arapela flanka Andrew Wairan we em i pairapim umben bilong Poro.

Dispela gol i mekim ol boi bilong Admin hostel i sikin kirap na i klostu, klostu long mak bilong Bara, tasol ol boi ros long hap sait wara tu ya ol i gat namba na wok long rausim ol long eria bilong ol. Long ol gutpela difens em skoa i sanap 1-0 Poro i go pas long hap taim.

Poro i kam bek strong long seken hap we Samson Kowa i setim gen wanpela bal long straika Chris long isi tasol skoarim namba tu gol bilong

Poru. Bara i no giv hap, ol i wok long subim het yet i go na kaikai bilong ol i kamap taim Clancy John i pairapim umben bilong Poro 1-2.

Bara i strong yet na no long taim ol i levolim skoa 2-2. Dispela difenda bilong Poro na umben i seksek.

Taim skoa i sanap 2-2 em nau tupela sait wantaim i wok long putim olgeta las strong bilong ol long skoarim wining gol.

Poro husat i gat bikpela laik stret long winim taitel bilong ol long LFA resis i lukim ol i putim olgeta strong na stail long winim dispela gem. Long dispela bikpela talik bilong ol em straika John Sam yet pinisim wok taim em i wipim wanpela strong bal i go insait long mak bilong Bara long winim dispela taitel 3-2.



Bik Bro REBO



YUMI KAM KLOSTU NAU... HOLIM STRONG!



NAU OL I KAM KAMAP!!!

ORAIT! KISIM PAS LONG NA GO LONG JAYAPURA.. KEFS!

TEANKU TRU LONG HELPM MI.. LUKIM!



EM I GO INSAIT LONG OPIS BILONG OL BODA KASTOMS NA ASKIM LONG PAS!!!

MI LAIKIM PAS LONG GO TASOL LONG JAWA- PURA NA KAMBEK.. MI GO PAINIM OL WOKAS BILONG BEAK, OL I CORAUN LONG HAP!

OH, YES! MI SAVE LONG OL... MI BIN GIVIM PAS LONG OL LONG LAS WIK TASOL.. OL I GO SPIN TASOL!



NAU KISIM WANPELA DINGI NA OL I TEK-OFF IGO!!!

ORAIT, YU REDI NA YUMI GO NAU!



BAI YUMI YU-SIM SOLWARA SAIT NA GO!

YU DRAIVA.. YU SAVE LONG ROT!

PUT! PUT!



LONG SOLWARA STRET REBO LUKIM WANPELA PATROL BOT..

PATROL BOT! EM OL HUSAT TRU?! PNG O INDONESIA!

IGO MOA NEKS WIK!



SIPAK MAIKY



TUPELA MEKIM SAVE I STAP NA REN I PUNDAUN ISI ISI!!!

ER, BRO! EM BAI REN YAH!

YU WARI, AH? LUSIM!



TASOL OL I NO SAVE OLSEM BIKPELA REN I PUNDAUN LONG TAUN NA BIKPELA RENWARA IKAM DAUN LONG DREIN!!!

BULDUMN!

YUPELA! FLAD, YA!



!?!?



NAU TUPELA APIM KATEN BIA NA OL I RON!!!

MAMA MARIAA..



TASOL TULET... WARAI KISIM TUPELA NA WILWILIM OL!!!



HELP! HELP!

ERIMA

IGO MOA NEKS WIK!

KANAGE



Kanage i bilong Bimin long Sandaun. Wapela taim em i bing go raun long wara Sepik na kaikaim ol abus bilong wara. Em i kam bek long ples na stori long ol poro bilong em. "Mi bin go raun long wara Sepik na kaikaim pis, pukpuk na kuka. Nu tu mi kaikaim mit bilong Teresia na Maria." Ol poro bilong em i paul na askim em. "Wanem emi Teresia?" Em i kirap na hatim ol. "Em ya!" "Mit bilong em i save swit ya! Het bilong em olsem snek na i gat olsem ston long baksait bilong em ya! Na swim olsem ya!" (Wokim eksen wantaim). Ol poro bilong em i lap nogut tru na tokim em. "Kanage! em i no Teresai, em i trosel". Nau ol i askim em long mit bilong Maria. Na em i tok "Em i ya! pis olsem snek ya! "Na ol poro kil long lap na tokim em. "Em i no Maria, em Maliau." Ol poro bilong Kanage lap nogut tru na lus wanwan.

Bexstar Tabubil Tabubil

Lapun Kanage i bilong wapela ples klostu long Tabubil. Em i go raun long Tabubil long lukim pikinini bilong em. "Pikinini meri bilong em wokim ti na givim bret wantaim long em. Em i supim olgeta bret i go insait long kap ti na rausim bret na kaikai isi isi. Bihain em i laik dringim ti, tasol ti i pinis. Kanage kirap nogut tru na tokim pikinini meri ya. "Pikinini! ating kap i mas i gat hol ya! Wara i pinis nating long hia" Tasol turangu. Kanage i paul. Bret i sokim olgeta wara na em kaikaim pinis.

Bexstar Tabubil Tabubil

Kanage em i bilong Wais long Ambunti distrik. Kanage em i wapela misin man. Olgeta taim em i save i go i kam long lotu. Wapela kampani i kamap long ples bilong ol. Kanage em i wapela kristen man na em i wok long tingting planti bai em i go wok long kampani o nogat. Bihain Kanage i senisim tingting bilong em na taim kampani i stat Kanage em i pes man long putim nem na em i go wok long kampani. Na Kanage i save gris long wapela wait misis na tu em i dring spak na i tok sapos mi maritim dispela wait meri bai mi abrusim hap bilong Papua Niugini na Kanage i kisim filings moa yet. Wapela Sande Kanage i no go long lotu na em i putim was i stap long dispela misis. Na Kanage i tok Matyu 7-7 heven yu ken go, graun em mi sta na Kanage i go long wok.

Lemech Jeremiaah Ambunti

Kanage i bilong wapela liklik ples insait long hap bilong Finsafan na em yet tu i holim wok olsem komiti bilong dispela ples. Wapela taim Kanage i paitim belo na bungim ol manmeri bilong stretim wapela liklik asua we i bin kamap namel long sampela lain insait long ples. Taim ol i bung pinis na toktok i stap, ol i herim planti nois tu i wok long kam

olsem long wapela hausboi we i stap i no longwe tumas long ples bilong bung, Kanage i no amamas tumas long dispela olsem na em i lusim ples bilong bung na i go bilong lukim husat tru i as bilong ol dispela nois ya. Taim em kamap klostu em harim olsem em sampela mangi tasol i wok long mekim ol pani stori nambaut na lap i stap. Belhat wantaim Kanage i go sanap long ai bilong ol dispela mangi, paitim bros bilong em olsem na ol i pasim maus. Bihain liklik wapela mangi namel long ol i kirap tokim Kanage. "Hei, mipela save yu Amerikan sailor ya. "Kanage i no harim gut, hariap tasol em soim pinga long dispela mangi na i bekim, "Em stret, na yu mas rispek. Long tokples bilong yumi ol i tok arang, arang baso. Na long tokples bilong ol waitman ol i tok rispek. Long tok pisin. Taim em pasim maus na traim tingim i stap, wapela bilong ol dispela mangi kirap bikmaus "Yu lindaw". Hariap tasol Kanage i bekim, "Em stret. Nat yu mas rispek." Nois long hausboi nau i winim olgeta nois bilong pastaim. Ino longtaim Kanage i kirap nogut olsem em wan yet nau i sanap longlong i stap long hausboi

John Bay Lae

Kanage em i save i stap long Mosbi em i nogat wok na em i save raun nating nating long Gordons na save grisim ol marit meri. Wapela taim em i grisim wapela marit meri na makim de long em, na meri i wanbel na tok, man bilong mi i save wok na yu mas i kam long san long haus bilong mi. Orait Kanage i go kamap long haus bilong meri na tupela gris. Tasol wapela noknok long dua na kwiktaim meri ya pusim Kanage i go antap long ruf. Na bihain narapela man i save paul wantaim meri ya i kam na tupela stil gen. Na bihain narapela nok long dua, na meri kwiktaim pusim man ya i go long kabot, na Kanage i stap antap na lukluk i stap. Na man tru bilong meri ya i kam na lukim meri ya i skin guria

na em i tok, yu mekim wanem i stap na yu no opim dua hariap. Koan, yu tok nau, na meri ya bekim tok na tok, mi no mekim wapela rong, tru tru, man antap i save, na taim meri ya i tok man antap i save, Kanage i kirap na tok, i no mi tasol. Wapela tu i stap long kabot na Kanage i kam daun na opim dua bilong kabot na pulim man ya i kam aut tu.

Jacob Kai Laloki

Nupela trausis bilong Kanage i bruk long as bilong em stret. Na em i tokim misis bilong em long samapim, tasol misis i bisi tru na i no samapim. Long Sarere Kanage i no sekim gut trausis, em hariap tru putim na go lukim pilai long Eriku, i stap na maus bilong em i drai tru long buai, olsem na em go long baim buai. Taim em i lindaun long kisim buai sem taim ol yanpela meri i lukim em na lap wantaim na singaut, Kanage watpo yu no pasim windau bilong haus bilong yu na em i op i stap. Nau Kanage tanim na tokim ol, nogat ya, Junia wantaim-mama bilong em i stap na mi no pasim. Na ol yanpela meri i tok, nogut: mipela i no lukim tupela. Windua tasol op na mipela lukim. Kanage kisim tingting pinis na hariap tru em bekim. Mi save yupela i stap long kol ples olsem na pasim olgeta windua bilong yupela. Mi i stap long ples hot olsem na mi opim windua bilong mi na raun. Taim ol meri i harim olsem, ol i no moa toktok ol i tekov tasol.

Mista A. Beneng Finschhafen

Lapun Kanage wantaim misis bilong em tupela bilong Henganofi long Isten Hailans provins wapela taim tupela stap bilong ples Hazafaga na pikinini bilong tupela go raun long Goroka taun na em baim wapela tots i kam long ples na long nait em bungim tos bilong em go long haus bilong tupela lapun na em go sindaun na lapun Kanage lukim haus bilong pikinini bilong em i lait olsem paia na em i

ting paia lait. Em tokim misis olsem tupela bai go long bikbus na go slip na lapun Kanage ting olsem paia na em boroim tots bilong pikinini bilong em na tupela redim ol paiawut bilong wokim paia na lapun Kanage tokim misis long givim paia lait long em na em bai wokim paia na tupela bai holim skin na lapun Kanage bungim tos long ol paiawut tasol paia i no lait na lapun ya han pen na givim tos i go long misis na misis traim i no inap na misis givim lapun na lapun ya traim i stap na batri flet na glob paia na i no lait na lapun Kanage isi tasol kisim namba 7 bilong em na mekim save long tos na 2-pela slip nating long nait na tupela kol nogut tru na eli moning tru lapun Kanage dastim i kam long haus na mekim save long ol paiawut insait long haus samting tru mi tos ya tasol lapun Kanage ting olsem misis.

Pajiho Hingo Kainantu

Kanage em wapela mangi Pinex, na em save slip raun long maunten na painim kapul na pisin. Long famili ol 3 pela tasol. Namba wan em man em wok long Madang, na namba tu em Kanage. Namba tri na las em meri, em wok long Goroka ANZ Benk. Wapela taim sista bilong em salim tok na tokim yu mas kisim sampela skin gras bilong kapul kam long Fraide fotnait wik. Em bungim i stap na Fraide moning em waswas na sanap long rot wetim bas. I no long taim wapela bas kam long Asaro na em pasim. Na i gat wapela sia tasol na mangi Pinex go insait. Em sindaun klostu long wapela resa meri ya na em tok moning long em. Tupela toktok i go i kam na resa meri ya askim em. Gras kapul bilong husat? Kanage bekim tok na tok em bilong sista bilong mi. Na meri ya askim em, mi laikim sampela tu. Kanage kirap tok yu laikim sampela gras bilong mi a.....meri tok yes? Kanage tok ok. Mi bai kisim bilong

yu kam, Kanage askim meri ya yu save i stap we? Meri ya tokim em Best Buy stoa tasol. I go long bas stop Kanage kalap pastaim na em tingting tasol na go long haus bilong sista. Em hariap skelim sampela long plastik pinis em stat kamautim. Wapela long daunbi- lo na kamautim long han na long het. Isi tasol em sindaun na lukluk long taim i stap. Na taim ya makim hap pas 11 manki Pinex lusim haus na 60 long Best Buy stoa na em wet i stap. Meri ya i laik go aut long бага nogut sanap pinis. Olsem na Kanage givim gras kapul long meri ya na meri ya kisim na tok tenkyu. Na em tokim em olsem em i no kisim makmak yet. Meri tokim Kanage olsem yu wet i stap, na 3 kilok mi kisim mani bai yu go. Meri ya go lans na em tanim rop i stap. Taim em tanim rop na miks wantaim gras kapul em tanim wantaim gras bilong i kamaut na pas wantaim bilong Kanage. Dispela taim meri i kisim taim na het tu i paul olgeta. Wan kilok em go long wok tasol, olgeta skin i les na het i pen. Olsem na em tokim bos olsem em sik. Meri ya kam ausait kisim manki Pinex na go long haus bilong sista bilong Kanage. Tupela i stap wan mun na meri gat bel. Olsem na meri ya save krosim Kanage olsem. Nus nogut, lek nogut han nogut. Man bilong wokim malala. Em tru olsem na Kanage i no save toktok em save tingim tasol na aiwara kamdaun. Olsem na em raitim pas long Wali-Hits, na tanim singsing bilong em. Mama 'y' na mi kamap kain manki olsem.

Wakoha Liru G. Goroka

Kanage em i save wok long kam bani tasol Kanage em i no yangpela man em i lapun olgeta tasol em i save strong tru long wok. Tasol taim em i lukim ol yangpela meri man Kanage em i save aigris stret long ol yangpela meri. Wapela taim potnait bilong em em i soim mani long ol, na ol i tokim em yumi go long bus em nau ol i go na ol i tokim em yu rausim trausis em nau Kanage i rausim trausis pinis em i as nating. Ol yangpela meri lukim olsem ol i kisim mani wantaim basket na ol i ronawe na Kanage em i hariap long putim trausis na em i putim tupela lek i go long wapela hol. Bilong trausis na taim em i laik raunim ol meri em i go pundaun kirap krangi stret na em i bel hat nogut tru na em i tok mi holim ol bai mi i no inap isi long wapela mi bai kaikaim stret long maus.

James B. Bialla

Kanage i bilong ples Yako long Vanimo wapela taim Kanage i sik na go long haus sik. Taim em i go kamap long haus sik ol nes i raitim sik bilong em pinis na tokim em long go kisim marasin taim Kanage i go insait, yangpela nes meri i kam kisim haus sik buk na tokim Kanage long sindaun long bet. Taim nes ya i kisim marasin wantaim wara long dring. Kanage daunim wara nating na marasin i pas long nek bilong em. Taim nes ya i lukim olsem, em i kam na askim Kanage tok olsem; waramo, na Kanage isi tasol holim nek bilong em na tok. Yako, Yako, na nes ya, i lap nogut tru na tokim Kanage mi no askim yu long nem bilong ples (waramo) dispela marasin i pas long nek.

Adam Makis Wewak

KANAGE



DIS IS MAI BRATA, AI BON FOWET EN HE BON BEKWET. DIS IS MAI FES HUSBAN EN DIS MAI NAMBTU HUSBAN. DIS MAI DOTA, AI SUT IT FROM DAT WAN!

I BEG YO PARDON? YOU SHOOT IT FROM WHAT, SER?



Papa Kanage bilong Sepik long Kunai kantri. Tasol baga nogut saveman long wokim poisen na sanguma pasin. Wapela taim ol i pasim tok long go reid long wanpela ples. Olgeta samting i redi na ol i tekop. Ol i kamap long ples na ol i banisim arere bilong ples na wokim puri i stap. Traipela tudak na Kanage i poromanim wanpela hap pos na sanap i stap. I no long taim na wanpela meri i pilim pekpek na i kamdaun tasol em i no save olsem ol sanguma i stap. Em i go na sindaun klostu long lek bilong Kanage na pekpek i stap. Meri ya pinis pekpek na kirap rapim as pekpek long hap pos tasol. Tudak na em i popaia na rabim as pekpek long bun bilong Kanage. Kanage i leit long singaut. Tasol sem i kilim meri ya. Na lus long tudak.

Jomax Leo, Wewak

Kanage i bilong Tambuim insait long Angoram distrik. Wapela taim Kanage wantaim brata bilong em i go long i go kism turis long Angoram. Taim tupela i kism ol turis pinis, ol i go antap long ples. Na ol turis i lukim wota haisin na askim Kanage olsem em wanem Kanage i kirap bekim long Inglis olsem, "It's a tambaran gras." Ol turis i lukluk long pes bilong Kanage na brata bilong em ol i askim olsem tupela i brata o nogat. Kanage kirap bekim long Inglis olsem, "dis is mai elda brata mi bon fowod and-bon bekwods." Turis i lukim tupela meri bilong Kanage na pikinini meri bilong em ol i askim olsem "em tupela bilong yu na pikinini tu". Na Kanage i ekt-ing man bilong Inglis na em i tok ", yes dis is mai pes hasben en dis is mai seken hasben en dis is mai dota ai sot it from that ." Ol turis i lap i dai olgeta. Ol i kirap go raun long bus Kanage i lukim palai bilong kaikai pekpek i slip long pok bilong diwai na Kanage i tok, "Masta, Masta luk si, luk si rait on sejen of dai krokodail".

Willie Sangi Angoram

Kanage em save laikim tru potato, wanpela taim long belo em ringim meri bilong em long kukim potato. Long haus Misis Kanage sapim potato i stap na telepon krai. Misis Kanage tokim 6 yia old Junia Kanage long wasim pototo na boilim long sospen. Na em yet i go anserim telepon kol bilong masta. Tupela Misis na masta maus wara i stap na Junia Kanage putim pototo long sink na wasim wantaim sop. na blis. Bihain em putim long sospen na boilim i stap. Long apinun Kanage angre nogut tru na hariap long kaikai. Em daunim pototo na insait bilong em kuk na smel sop i no pilai pilai. Em kirap na tok "Hey! wat a kuk yu kuk?" "Yu are fairin mi from top to bottom ". Junia Kanage kirap na tok, "Oh no, dady, there can't be, I washed them myself with soap and bleach."

Conrad Dulump Mt Hagen.

Kanage i kism bikipela sik tru na em i wokim paia na slip long paia. Na seim taim ol manmeri pikinini tu i bung kaikai bilong ol tu long dispela hap eria bilong bikman Kanage. Em nau papa Kanage islip olgeta na ol famili bilong em tu i go stap wantaim ol biklain bung kaikai na paps Kanage tasol bikipela sik nau. I no longtaim wanpela dok i painim ol hap kaikai nambaut i kam olsem long ples we paps Kanage i slip long en. Em nau dok ya i lukim hap drai diwai i slip long fron bilong sik man na dog i holim wanpela lek na sutim pispis i go long hap diwai ya tasol pispis i abrusim diwai na kism stret olgeta hap pes bilong trangu sik man ya. Em nau trangu paps Kanage i kirap nogut na em i bikmaus long ol manmeri na tok holim em holim em mekim na ol manmeri i paul long singaut bilong em, na ol i ronawe nambaut. Sampela i ronim stret dok na sampela i ron nabaut painim ol poroman. Na semtaim wanpela meri i ron stret i go na holim pos sik man Kanage. Em nau Kanage i bik maus na tok mi no tok long holim mi. Mi tok long holim dok na meri ya i bekim olsem em orait mi laik holim bilong yu na ol arapela i ken ronim bilong dok. Ol bai holim bilong dok na paps Kanage i bekim ken olsem em orait tasol mi kism bikipela sik olsem na mi pret nogut yu holim bilong mi Karangi. Na meri ya i bekim olsem bro nogat wari i no ol pikinini i holim mi mama ya mi yusful pinis long dispela kain holim na bai mi holim. Bilong yu gut. na taim papa Kanage i holim olsem em i kism bikipela sik ken na em i slip indai olgeta ken. So em tasol liklik hap stori bilong paps Kanage i kism bikipela sik na bihain em i orait taim wanpela meri i holim em.

Luke Waski Vanimo

Pestaim tru Kanage baim wanpela moskito net. Em i ting net ya

bilong slip antap long en. Nait nau em i pasim net na em i tokim ol famili long slip insait na em yet bai slip antap. Orait meri wantaim ol pikinini i slip insait na em yet i raun biknait nau em i kam laik slip antap ya nogat net i bruk na em i pundaun antap stret long meri bilong em. Traipela biknait tupela meri bilong en i pait. Na long moning meri i kism net ya brukim i go liklik liklik na wokim paia long en.

Mr. Stern Phil Blaiton Madang

Kanage em bilong Lufa. Long listen Hailans. Liklik hauslain Nupuru. Papa bilong Kanage em i dai na Kanage em tingting planti bai mi mekim wanem papa em i dai. Yu save Kanage em wanpela stail manki. Mi Kanage mi gat K200.00 tasol i stap. Em tokim mama bilong em olsem bai mi haia wanpela ka, mi bai i go long Kainantu na kism wanpela kofin boks bilong papa. Bai mi putim em insait na palanim em. Na mama i tokim Kanage olsem yu kat gutpela tingting, so yu ken i go Kanage! Na Kanage em i go na askim wanpela ka olsem gutpela nait bosman bilong ka. Inap bai yu helpim mi. Papa bilong mi pasim tupela ai pinis olsem na mi laik i go long Kainantu, kism kofin box. Bai mi givim yu 5-pela het bilong pig. Draiva em tok yes. Ol i siksti i go long K92. kism kofin boks pinis ol kam bek. Yu save pinis hailans em ples bilong ren. Ren em i no isi iso na Kanage em tingting planti. Bai mi mekim wanem. Dispela ka em i nogat sel, olsem na Kanage em opim kofin boks pinis em i go insait na slip i stap, na ol i kam. Tupela marit i stopim ka ol laik kam long Goroka. Tupela marit luk olsem Papua. Kanage em slipim dai insait long kofin boks i go i go na em harim olsem ren i pinis em stat long opim boks. Yu save meri Papua em lukim boks i muv i go taim meri lukim. Dispela em stat long pispis ron long laik bilong em. Taim Kanage em kirap long kofin boks, meri wantaim man bilong em. Tupela i kalap i go taim ka go

yet. Draiva em i kam long Goroka bas stop. Em weitim tupela marit long i go daun. Na tupela marit i no i go daun. Draiva em askim Kanage olsem yu lukim tupela marit o nogat. Kanage em tok mi slip insait long kofin boks taim ren i kam taim ren pinis mi kirap long kofin boks. Nogut tupela i lukim mi na kalap long ka i go pinis. Kanage em putim het bilong em i go daun. Mi Kanage stail mangi.

Mainex Hocky Mt Hagens

Kanage em i bilong ples Fangalawa insait long Kavieng, NIP. Kanage em i wanpela spak man stret. Meri bilong Kanage grasrut meri. Wanpela taim Kanage i raun long Kaiveng taun. Taim san i go daun Kanage i paitim anti bilong em. Long semtaim tu kandre bilong Kanage i stap. Na i laik stopim kandre i go. Na kandre i les tasol i pundaunim Kanage, Kanage i kirap isi tasol i sekim pes bilong em. Kanage i kaikai buai liklik pinis. Kanage i tokim anti na kandre bilong em olsem. Nambawan raun mi lus tasol bai mi go long haus yutupela em stat singaut. Kanage kism sisel bilong katim oil pam. Em singaut na tok "David" mama bilong David. Goliat i kam tete bai mi kaikai pekpek bilong yutupela. Taim anti na kandre i lukim Kanage i tok Goliat long em. Na i holim sisel bilong oil pam tupela lus i go long tudak na Kanage i stat long Inglis "My wife makes money I makes money we mix it arau I spak. Taim kandre na anti i harim Kanage i Inglis tupela i kilim skin long lap.

Kenneth Mathew Kavieng

Kanage lusim Mosbi siti na kam raun long Kabuifa hauslain. Ol manki long ples lukim Kanage na bikmaus long em. Na soim tang long em na Kanage bel kaskas nogut tru na krosim ol manki. Yupela go na kaikai intanesenel. Taim Kanage krosim ol manki olsem, em tekov na ol manki long

ples ol paul stap.

Paul Pora, Goroka

Kanage em komyuniti skul tisa. Em tisim gret 2 klas. Insait long klasrum wanpela manki kapupu. Kanage pilim i nogut. Em tok, plis I don't want to smell again. Namba tu taim kapupu Kanage tok husat Kapupu tromoi han i go antap bai mi givim K2. Olgeta nogat. Klas bilong em i gat 16-pela pikinini em tok 15 nogat wanpela tasol. Namba 3 taim kapupu tisa Kanage kism wanpela grup i go long toilet haus. All of you go inside and stay 30 minuts, 30 minuts pinis narapela 30 minuts bilong narapela grup. Tisa Kanage tokim ol olsem yupela laik kapupu o pekpek o pispis o tasol ok yupela tok olsem eksklusmi tisa may I go outside. Tok olsem na go outside na rausim pipia. Good afternoon boys and girls. Good afternoon, Mista Kanage tok olgeta kapupu lain go long haus na kaikai gut. Olgeta lap i dai.

Koma Rodney Mt Hagen

Kanage em wanpela rastaman bilong Jebu. Na yu save, ol Zebu ol lain bilong wokim ol deti rasta. Kanage em wanpela bilong ol. Wanpela taim long Bradas Klap, ol i pilaim papa kela. Taim Kanage i harim olsem, wan, tu em kalap i go insait na danis raggae wantaim wanpela meri KMR. Meri ya kirap tromoi tok olsem, Ho Yaka Raygao Ho Rasta. Taim Kanage i harim olsem, em i tok, em raggae gras bilong ol Makam ya kotim stret lewa, em i no rasta gras being Jebu.

Albert Waii Kundiawa

Kanage i save long olgeta singa na singsing bilong ol. Tasol singsing bilong Willie Torobu, as i go as i kam tarangu, Kanage i no save stret. Taim Kanage i harim dispela singsing namel long strit bilong ol KMR. Em i kirap nogut na singaut, em husat stret ya. Na ol DJ masta i bekim, em Willie Toropu bilong Madang ya. Madang i save brukim lewa bilong hat na hat i save gat kuru ya. Taim ol DJ masta i harim olsem, ol i tok geia boks i no bagarap. Na Kanage i tok olsem, na lewa bilong as tu.

Albert Waii Kundiawa

Kanage em i wanpela lus man long Nipinaga long Lufa Distrik insait long Isten Hailens provins. Em i adoptim liklik boi na lukautim em. Wanpela taim em i laik hakim malio long wara Damaguta. So Kanage wantaim liklik boi bilong em tupela i go klostu long wara kalap bilong Damaguta na tupela i holim pasim traipela ston arere long wara na krai wantaim tupela i beten long seten olsem. O seten, yu helpim mitupela na bai mitupela hakim planti malio. Sapos, mitupela hakim planti malio, mitupela bai givim yu sampela malio. Em nau, tupela i hakim planti malio pinis na liklik boi bilong Kanage i kirap na tok olsem. Papa, seten tasol i helpim mitupela na mitupela i hakim planti malio ya, bai mitupela i givim em sampela o nogat? Papa Kanage i kirap na i tok olsem. Pikinini, noken wari! Mitupela i giamanin em tasol ya.

PNGBC pulim rekot profit long 1998

PAPUA Niugini Benking Kopresen beng i bin wokim moa win mani insait long 24 yias em i operet long en.

Beng bai i selebretim 25 krismas long mun Me na long ol ripot we beng i bin autim long dispela wik, beng i bin pulim rekot winmani wantaim K35.1 milien long 1998 bihain long ol i rausim takis long en. Bipo long ol i rausim takis, winmani i bin nap long K46.7 milien.

Dispela i soim olsem long 1998, winmani i bin go antap long K19 milien bikos long 1997, em bin wokim K16.29 milien tasol.

Long dispela taim wok mani insait long kantri i bungim hevi na ol beng i wok long sasim bikpela mak intres long ol dinau

tasol maski long dispela yia, rekot i soim olsem beng i winim ol arapela yia na kamapim rekot profit.

Siaman bilong PNGBC kampani grup Peter O'Neil i tok eria we beng i pulim winmani long en em long planti dinau we beng i bin sasim bikpela intres mak long en na tu gutpela ausait mani we i bin kam insait long kantri.

Em bin tok winmani i givim gutpela piksa long kantri bikos PNGBC em i wanpela beng bilong PNG yet we i save sevim olgeta hap bilong kantri.

Na tu 1997 na 1998 i bin hatpela yia long kantri we em bin bungim hevi long sait bilong mani, Mista O'Neal i bin tok.

Em i tok ol lain husat i wok long tok kantri bai bungim moa hevi na bagarap bikos mani i sot i mas i mas lukim dispela wok kamap olsem gutpela piksa long sait bilong mani.

Em i tok tu dispela piksa ya i soim olsem disisen we Skate/Lasaro gavman i bin mekim long go hetim progrem bilong praivetaisim ol bisnis na grup we gavman i papa long ol long kamapim mani em i gutpela.

Em i tok PNGBC i sevim olgeta pipel long kantri long sait bilong benking, insurenas na dinau mani na olsem wanpela koporet bodi, em i laik mekim gutpela wok na winmani na kamp olsem maket lida.

Groas asosiesen tok lukaut long nupela kopra asosiesen

YAKAM KELO i raitim

IS Nu Briten brens bilong PNG Groas Asosiesen i tok lukaut long kopra industri long hevi bai i kamap long wok bilong nupela Kopra Produsas Asosiesen. Kopra Maketing Bod (CMB) i bin kamapim dispela asosiesen.

Is Nu Briten brens presiden Mista Wapoot i tok kamap bilong dispela asosiesen i soim olsem Kopra Maketing Bod bai go pas na kontrolim ol lo na lejislesen bilong kopra industri. Bai ol i maketim kopra industri na nau ol i laik kontrolim groa bilong kopra insait long kantri.

Mista Wapoot i askim wanem sans o rot ol fama i gat long kontrolim o go pas long rot bilong ol yet long kamapim samting insait long dispela industri.

Em i askim tu wanem fridom ol kopra produsa i gat long toktok long wanem kain hevi na toktok bilong industri taim Kopra Maketing Bod yet i wok long go

pas long olgeta wok na servis bilong ol groas.

Em i tok dispela no gutpela tra long gavman i wanbe na garem dispela servis long kamapim gat kot salens stap yet taim long Kopra Maketing Bod na groa long husat em maunabik bilong ol kopra produsa. Mista ken skelim dispela olsem wanpela rot bilong blokim dispela kintong no ken kamap na stapim insait long i noken kamap em i tok.

Toktok bilong Minista (Agrikasa na Laivstok Tukape Masani) long tok olsem kamap bilong dispela nupela Kopra Produsas Asosiesen i gat bikpela sapot long olgeta kopra provins i no tru. Dispela em giaman toksave Minista i kisim long wanem samting i wok long kamap long kopra industri, em i tok.

Mista Wapoot i tok ol kopra produsa insait long PNG i bin autim tingting na hevi bilong ol long soim sapot bilong ol long PNG Groas Asosiesen insait long las 6-pela mun tasol Minista i no bin kisim dispela tok tru.

Ol meri mas go insait long ol bikpela wok bisnis

OL MERI i mas strong long muv fowed na stap insait long ol wok ikonomi bilong kantri tude.

Ol i mas divelopim pasin bilong kamapim komesel tingting o pasin long go insait long ol wok bisnis.

Lida bilong Oposisen, Bernard Narokobi i bin wokim dispela toktok long makim de bilong ol meri long olgeta hap bilong wol ol i kolim long Wimens Intenesenel De. Em i tok ol atoriti i mas senisim sampela ol polisi na givim sans na fridom i go long ol meri long salim ol bikpela samting, na i no ol liklik samting tasol olsem buai na pinat samting.

"I no buai na ol liklik samting tasol ol meri i mas wokim, nogat. Ol mas muv long nupela maket sistem, go

insait long bikpela bisnis na salim ol redio, henkrats na ol arapela samting moa. "Salim buai, pinat na ol liklik samting olsem em i no gutpela.

"Ol meri i mas go insait long wok bilong moden ikonomi, kisim gutpelas skul na kamapim pasin bilong i no pret long mekim wok o ranim bisnis. Em bin tok strong long ol meri long kisim trening long midel na top level menesmen.

Mista Narokobi i bin tok ol meri i save lukautim gut mani na planti kantri nau i wok long luksave long dispela samting.

"Olsem na yumi tu i mas givim sans long ol meri long tren long ol midel na top level menesmen," Mista Narokobi i tok.

Tasol em i tok ol PNG man i mas senisim pasin na lukluk bilong ol long ol meri olsem ol (meri) i gat digniti na ol i ken kamapim ol gutpela samting, olsem ol man tasol.

Wanpela long ol meri husat i bin stap long bung i tok planti long ol liklik bisnis bilong salim kaikai na ol stua nau long Mosbi siti em ol ausait lain olsem ol Esia lain i tekova. Em bin tok em i wanpela long ol meri husat i laik ranim liklik Haus Kaikai bisnis insait long siti. Em bin stretim ol pepa tasol taim em i askim long tokorait long kisim opis spes na rentim haus long wokim bisnis, ol atoriti i no givim okei long en. Em i askim ol atoriti long givim helpim long ol liklik asples bisnis meri na man.

MAS I KAM INSAIT NA WOKABAUT STRET IGO LONG NAMBawan DIL STRET LONG TAUN !

Baim nau nupela Toyota Dyna 3.5 Tan Trak bilong yu long wanpela Ela Motors ofis long dispela mun na kisim fri wanpela Kopi Palpa petrol mota wantaim fri 100 Kopi Bek. Hariap...Mas i kam insait na wokabaut stret igo long nupela Toyota Dyna trak tude!

HAU LONG KISIM FRI KOPI PALPA BILONG YU NA FRI 100 KOPI BEK LONG ELA MOTORS KLOSTU LONG YU.

Isi, putim nem na adres bilong yu, putim wantaim Ela Motors Fainel Invois Namba na deit taim yu baim kar. Katim rausim dispela Setifiketi daun bilo o karim dispela advetisman hia na bringim long Ela Motors ofis klostu long yu bilong glasim na oraitim.

DISPELA OFA BAI I STAP IGO INAP MAS 31, 1999.

VOUCHER
Setifiketi bilong Saim

NEIM :

ADRES :


FAINEL INV. Namba:

Deit taim yu baim:

Ela Motors
TOYOTA

SUPA SPESEL DRAIVIM IGO PRAIS LONG OLGETA HAP LONG KANTRI.

PORT MORESBY PH 3229400 LAE 4722322 KOKOPO 9829100 RABAUL 9821988
MADANG 8522188 GOROKA 7321844 MT HAGEN 5421888 WEWAK 8562255
KAVIENG 9842132 KIMBE 9835155 TABUBIL 5489060 VANIMO 8571254
PORGERA 5479367 KUTUBU 5496685 BUKA 9839915 LIHIR 9864099 ALOTAU 6410100



Praim Minista helpim ol asples Mekeo

SENTREL RIPOT

KENNEDY EDENE i raitim

PRAIM Minista Bill Skate i bin mekim wanpela raun i go long ol pipel bilong Not Mekeo long ples ol i kolim Akufa long las wik. Dispela ples em ol manmeri i save go tasol long dingi bihainim wara Angapanga i go.

Long dispela raun bilong Praim Minista, em i givim olsem K40,000

i go long Akufa viles wod presiden we K10,000 i go long komyniti skul na K30,000 i go long ol wok bilong sios long ples.

Insait long dispela raun bilong em, em i bin tokaut olsem em i laikim ol lain long Oposisen long wok bung wantaim em na ol i mas dvelopim ol wok na sevis insait long ol asples. Ol i no ken tok pait tumas long pasin politiks bikos ol manmeri long ples i wok long sindaun nogut. Insait long dispela raun bilong Praim Minista Bill

Skate, ol arapela bikman olsem Gavana bilong Westen hailans provins Pater Robert Lak, Trensport Minista Vincent Auali, Sekreteri bilong Provinsal na Lokol Level Gavman Afeas Colin Travertz na Geming Bod siaman Paul Aisa. Bihain olgeta i bin kalap long tupela haia helikopta na go long wanpela ples ol i kolim Oriropetena we moa long 1000 manmeri i bin welkam ol. Dispela i bin namba wan taim wanpela Praim Minista long go mekim raun

insait long ol asples bilong Mekeo. Long dispela ples Oriropetena, Mista Skate i givim K30,000 sek mani i go long ol long stretim ol wok bilong skul na haus lotu long ples.

Mista Skate i bin tokim ol pipel long hap olsem Gavman bilong em i redi long bringim sevis i go long ol asples pipel.

Mista Skate i tok em i wanpela namba wan Praim Minista ol man i save sutim tok long em nating nating na i nogat gutpela as o tok tru

long en. Taim ol gutpela man i mekim gutpela wok, ol man nogut i save wok hat tru long traim daunim na bagarapim ol, em i tokim ol pipel bilong Mekeo.

Em i tokaut olsem em bai givim mani long ol memba sapos ol i gat mani plen na redi long yusim ol long ol projek.

Mi inap givim mani sapos yupela yet i no pait namel long yupela. Dispela inap bagarapim ol wok na projek long kamap gut, Mista Skate i tok.

Noten Kopi groas asosiesen i no amamas long Gavana Siembo

ORO RIPOT

NOTEN Provins kopi groas nau i laik kotim Oro Gavana Sylvenus Siembo na eksekutiv bilong em long disisen bilong ol long rausim jenerel menesing na ol bod memba bilong kopi mil bilong Oro provins.

Asosiesen presiden Wellington Jire i tok disisen bilong Oro gavman long saspensim ol bod memba na menesa bilong Noten provins kopi mil Mista Geroro i no gat gutpela as tru bilong bikos dispela em tingting politiks tasol we i no inap helpim ol pipel na kamapim wanpela gutpela samting.

Gavana Siembo i bin mekim dispela disisen insait long wanpela provinsal asembli kibung we i tokaut long saspensim ol bos na bod memba bilong kopi mil.

Mista Siembo i bin ripot olsem ol eksekutiv bilong em i bin kamap wantaim planti kain kain tingting bikos taim dispela kopi mil i bin stat, i bin nogat tru wanpela fainensel ripot bilong kampani i save kamap long ia bilong gavman bilong provins long

olgeta yia.

Tasol Mista Jire i tok ol kopi groas i laikim kopi mil i mas sanap na em i bikpela samting tru ol pipel i laikim na ol ino inap larim ol giaman politiks i bagarapim gutpela wok ol pipel i laikim long i mas kamap na stap long helpim ol.

Em i tok asosiesen i wok long painim ol sampela tingting na edvais long pusim dispela laik bilong ol long i mas kamap na rausim dispela kain politiks pasin bilong Gavman bilong Siembo.

Tasol sampela ripot i tok pinis olsem Mista Jire wantaim Gavana Siembo na ol gavman opisel i bin bung wantaim na wanbel long stretim dispela hevi namel long ol yet.

Tasol ripot i kam long Invesmen Promosen Atoriti (IPA) olsem provinsal gavman i no inap stap olsem sea holda insait long dispela kopi mil inap mama lo o konstitusen bilong kopi kampani ya i tok orait.


Lo bilong kampani i tok 7-pela dairekta em ol i makim olsem bod ov dairektas na nogat provinsal gavman inap senisim o rausim ol.



Tanim bel..

• Max Daim, em i wanpela raskol mangi bilong Gade setelmen insait long Mosbi. Daiam i bilong Goilala na em i bin tanim bel long taim wanpela kruse bilong Iesu, ol i kolim, 105 Iesu i bin kam insait long setelmen bilong em. Daiam i bin mekim promis long noken wokim raskol pasim gen na em givim dispela hom med gan bilong em i go long pasto bilong em. *Poto: Ivan Bayagau.*

Genia wetim K150,000 bilong Abau ilektoret



• Kilroy Genia.

MEMBA bilong Abau Kilroy Genia i tokaut olsem em ino kisim yet K150,000 Distrik Sapot Gret (DSG) mani bilong em yet long Gavman. Dispela mani i bilong las yia 1998 we planti memba bilong Gavman sait i kisim pinis.

Mista Genia i tok dispela pasin Gavman i mekim long i no givim mani bilong ol pipel bilong Abau i no gutpela tru na i soim kain gridi pasin bilong dispela Gavman bilong Bill Skate.

Mista Genia i tok em i laik mekim klia olsem dispela mani em mama lo bilong kantri i tokaut olsem olgeta memba i mas kisim long sapotim ol wok projek na wok insait long ilektoret bilong ol wanwan. Na Gavman i nogat rait o

pawa long stapim ol pipel long kisim dispela mani bilong ol we mama lo i tok ol i mas kisim olgeta yia.

Em i tok maski Gavman i gat wanem kain tingting long panisim wanwan memba, dispela i no gutpela tru bikos i no ol memba bai kisim hevi. Ol pipel bai kisim hevi long pasin bilong Gavman.

Mista Genia husat em wanpela Gavman memba insait long Skate na Lasaro gavman i tok nau ol memba i no inap tok pait long dispela mani bilong ol pipel bikos Gavman i surikim taim bilong palamen i bung i go long mun Julai.

Mista Genia i tok olgeta Gavman i no inap wok gut sapos ol i gat klia na stretpela rot bilong

kamapim kaikai bilong wok. Polisi na plen bilong ol long ronim kantri i mas stap klia taim ol memba i toktok long stretim ol eria na hevi we i stap. Na dispela em rot tru bilong stretim Gavman i sanap bihainim plen na polisi bilong em sapos kantri i popaia liklik long rot em i go long en.

Memba bilong Abau i tokaut tu olsem hevi i mas go long olpela Gavman bilong Sir Julius Chan na Chris Haiveta long kisim Sandlain ami i kam long PNG na westim bikpela mani bilong kantri. Tasol em i askim dispela Gavman bilong Bill Skate long i mas glasim gut ol hevi na kos bilong dispela samting na i no ken pusim em yet i go insait nating long salensim kontrak

bilong Sandlain moa yet long kot.

Mista Genia i tok em i no stret tru long dispela gavman i go het na baim bikpela mani i go long ol ovasis loya long karim dispela kot i go moa yet we mak bilong mani Gavman bai lusim i winim mak bilong mani olpela Gavman i bin yusim long baim Sandlain.

Em i askim Gavman long i mas isi liklik na skelim gut ol samting pastaim bikos dispela samting i no sut tasol long wok politiks. Tasol dispela hevi i wok long kamapim moa hevi long sait bilong mani (ekonomi) long kantri na sindaun bilong ol pipel long kantri olgeta.

Em i tok PNG Gavman bai tro-moi bikpela mani moa sapos dispela kot i go het yet na i go long ol bikpela kot.



Rong Bilong Pasindia Sip MAS 1999

For Passenger Bookings or Information Contact Titus or Ita Ph: 472 2066 Fax: 472 5806, P. O. Box 1459, Lae, Morobe Province.

Vessel Voy No. Sailing from Lae for: Day Date Time

Please Note

"Gejamsao will be out for service from the 21st of March for Annual Survey, we regret any inconvenience caused by this disruption to our normal schedule service. Please refer to the schedule below for services during this period.

"Gejamsao >>>>>> Offers Daily Passenger & Parcel between Lae and Buki

"Gejamsao >>>>>> Departs Lae @ 0900am and Arrives Buki at 11.30am

"Gejamsao >>>>>> Departs Buki @ 12.30pm and Arrives at Lae at 3.00pm

Table listing shipping schedules with columns for Vessel, Voy No., Sailing from Lae for, Day, Date, and Time. Includes entries for Mamose Exp, Rita, Manebe, Nagada, Umboi, and Nagada.

Table listing shipping schedules with columns for Vessel, Voy No., Sailing from Lae for, Day, Date, and Time. Includes entries for Rita, Mamose Exp, Nagada, Umboi, and Nagada.

Ron Bilong Kago Sip

MAS 1999

For Cargo Bookings Information:

Contact Philip or Yadi Ph: 472 2066 Fax: 472 5806, P.O. Box 1459, Lae, Morobe Province.

Vessel Voy No. Sailing from Lae for: Day Date Time

MAIN PORTS:

Table listing shipping schedules for Main Ports with columns for Vessel, Voy No., Sailing from Lae for, Day, Date, and Time.

SMALL PORTS:

Table listing shipping schedules for Small Ports with columns for Vessel, Voy No., Sailing from Lae for, Day, Date, and Time.

Lukluk bek long ol nius nabaut Paia kukim wanpela olupela skul

LAE

PAIA i kukim na bagarapim tru wanpela olupela komyuniti skul long Lae long dispela wik. Dispela skul em Taraka komyuniti skul klostu tasol long Yunivesiti ov Teknoloji long Lae. Bagarap bilong paia i mekim planti studen i nogat klasrum na ol i skul aninit long as bilong diwai.

Ol lain bilong was long hevi bilong paia, Paia Briget long Lae i tok ol i no inap long pait wantaim paia bikos strong bilong ol i no inap.

Ol i sot long paia ka bilong go kwiktaim long hap bilong paia na tu ol i sot tru long mani bilong strongim wok bilong paia briget i stap gut na redi oltaim long pait wantaim birua bilong paia.

Dispela hevi bilong paia briget long Lae em bikipela samting bikos nesenel gavman i lusim dispela wok bilong lukautim operesen bilong paia sevis i go long han bilong provinsal gavman. Tasol provinsal gavman i nogat inap mani long helpim paia briget tu. Long wiken tasol narapela paia tu i bin kamap long haus bilong bos bilong Morobe Tours long kona rot. Tasol paia briget i no inap go hariap long dispela hevi bikos ol i nogat strong na sapot bilong mekim dispela.

Olsem na ol paia briget lain long Lae i tok ol ino laik bai hevi bilong paia i kamap klostu klostu long Lae bikos ol inogat strong na sapot bilong stretim dispela hevi.

Birua bas paia

MOSBI

Ol sampela asples lain bilong Wanigila long Koki i bin kukim wanpela PMV bas bilong ol hailans long las wiken taim bas ya i bin kamapim birua long wanpela liklik pikinini bilong ol

long wiken arere long Ela Beach nambis.

Ripot i tok dispela PMV bas i save olsem em i mekim trabel na em i go stret long han bilong plis stesin long taun. Tasol taim ol Wanigila lain i kam, ol i rausim dispela bas i go ausait long rot na laitim paia long en.

Ol lain bilong dispela PMV bas i no amamas tru long dispela pasin bikos ol i tok ol i karim dispela hevi i go long han bilong lo tasol ol plisman i kirap gen na larim ol asples i laitim paia long bas bilong ol. Ol i tok ol plisman i sapatim ol pablik long किसim lo i go long han bilong ol yet.

Daunim lo na oda hevi na pulim moa bisnis na turis

Ambasada bilong Japan long PNG Yasuhide Hayashi husat i i lusim kantri long go bek long Japan i bin tokaut olsem PNG i mas stretim ol hevi long lo na oda pastaim sapos em i laik pulim ol bisnis man na turis bilong Japan i kam insait long kantri. Em bin tok ol bisnis man bilong Japan bai noken kirapim bisnis long PNG inap hevi long lo na oda i go daun na ol man i pilim olsem em i seif. Mista Hayashi i bin wokim dispela toktok taim em i bungim Praitim Minista Skate long opis bilong em las Fraide. Em bin tok long nomol bisnis, em no nap singautim ol bisnis man bilong Japan long kam long PNG. Em bin tok ol bisnis man bilong Japan i no ol lain bilong bikmaus, ol i save stap isi na wok na sapos ol i pilim olsem em i seif, ol bai kam. Em bin tok ol turis i gat wankain tingting long hevi bilong lo na oda hia. Moa long 700,000 turis bilong Japan i save limlimbur i go long Australia

insait long wanpela yia na 500,000 i save stop ova long Kens. Mista Hayashi i tok sapos hevi bilong lo na oda insait long kantri i kamap gutpela, 10 pesen long ol visita ya i ken kam long PNG. Ol i pilim olsem Kens i seif na ol (turis) i go long hap na sapos ol i pilim wankain long PNG, ol bai kam. Em bin tok ol ples olsem Madang na Goroka em ol turis bilong Japan i laik go long en. Mista Hayashi i bin tok strong long Mista Skate long wokim ol strongpela disisen long daunim hevi bilong lo na oda na long dispela rot, moa bisnisman na turis bai kam insait long kantri.

Foren Afeas Minista Roy Yaki i bin tok amamas long Mista Hayashi long gutpela wok we em bin mekim long strongim prensip namel long Japan na PNG na tu long helpim ol grasrut komyuniti insait long kantri long karimaut ol helt na edukesen projek.

Ol witnes tok ol bin bagarapim ol balot pepa

MADANG

Wanpelas ki witnes long ileksen petisen bilong olupela memba bilong Sumkar insait long Madang provins Peter Yama i bin tokaut olsem em bin stap insait long wok bilong bagarapim 1,000 balot o vot pepa we i bin gat nem bilong Mista Yama insait long 1997 Jun Nesenel ileksens. Ol ripot i tokaut long nem bilong man ya olsem Blasisius Shong wanpela poling kuskus long Sumkar insait long Eleksen '97. Em bin tokim kot

olsem long taim bilong ileksen, i bin gat plen long autim Mista Yama long sia na em bin stap insait long grup we i laik wokim dispela samting. Ol ripot i tok narapela witnes, Bob Apuai husat i bin sekyurirti long dua long taim bilong ileksen 97 i tok em bin wanpela long ol husat i bin bagarapim ol vot bilong Mista Yama.

Tupela man i tok ol bin rausim namel long 800 na 1,000 ol balot pepa na kukim long rambis taim ol i ting nogat man inap lukim ol. Tasol tupela ples lida

bilong Karkar Ailan i bin lukim ol i wokim dispela samting.

Mista Yama i bin lus long 675 vot.

Long narapela wankain stori olsem long Enga provins, narapela witnes i bin tokaut long kot long Hagen olsem sampela lain i bin blekmeilim em long wokim dispela samting long traime autim man husat i holim sia, Jimson Sauk. Ol ripot i tok Manus Ring i wanpela skul tisa husat i bin wanpela ileksen opisa long Hagen.

TOKSAVE



KOPI GROWAS NA PROSESAS LONG LO I STOPIM BAIM NA SALIM SERI KOPI

1. CIC Lo bilong stopim pasin bilong baim na salim seri kopi long sait bilong ol rot na insait long hauslain em i stap yet.
2. Dispela Lo i stat pinis long dei 1 mun Mas 1998.
3. Ol papa bilong Wet Fektori i gat laisens tasol bai baim seri long ol plentesin, blok na bikpela gaden bilong ol smolholda pama husait laik salim seri kopi.
4. Ol dispela Wet Fektori mas baim Resista Pleit long CIC bilong karim seri kopi long gaden i go long fektori. Prais bilong wanwan pleit em K100. Kar we bai karim seri long plantesin, blok or bikpela gaden bilong smolholda pama mas karim dispela resista pleit. **Ol Resista Pleit i no bilong baim seri or karim raun raun na baim seri long en. Nogat. Em bilong karim seri igo long Fektori tasol.**
5. Long mun Octoba 1999, CIC bai raun inspektim olgeta Fektori gen. Wanem Fektori i no inapim stendet o mak bilong CIC, em CIC bai pasim olgeta.
6. Ol smolholda pama husait nogat kopi palpa (kopi masin) bai i gat sans long baim long CIC. Yuropien Yunion i givim moni long baim kopi masin na CIC i nau salim long prais ol baim long en. Husait pama kam wantaim moni pas taim bai kisim pastaim.
7. CIC bai wok bung wantaim ol Polis, Vilis Kot na Kaunsol long strongim dispela Lo long stopim man i nogat laisens long baim na salim seri or stilim seri kopi. Man husait i brukim dispela Lo bai baim K1,000 fain c go kalabus long 6-pela mun.

BADIRA VARI
CHIEF EXECUTIVE OFFICER

SP AWOT RIPOT

Fainel nem bilong SP Awot i kam aut

SELEKSEN komiti bilong SP Awots i tokaut pinis long nem bilong ol fainel spotsman na meri long resis bilong dispela yia.

Biknem ragbi lig pilaia Marcus Bai, Stanley Nadex na Lynch Ipera i gat nem long bikpela awot bilong yia.

Bai i save pilai wantaim Melbourne Storms long Australia. Em bai kisim gutpela salens tru i kam long Nadex na Ipera. Ipera i winim bronze medal long Kuala Lumpur, Malaysia.

Long dispela yia yet, SP Holdings husat i save sponsorim ol awot i gat arapela poroman sponsa, Puma.

Sportsman of the year

- *Marcus Bai
- *Lynch Ipera
- *Stanley Nandex

Spot

- ragbi lig
- boksing
- Kickboksing

Sportswoman of the year

- *Naluge Guy
- *Margaret Josephs
- *Liz Wardley

Spot

- skwas
- Sofbal
- Yachting

Team of the year

- *PNG Womens Basketball
- *PNG Kumuls
- *PNG Pukpuks

Spot

- Basketbal
- ragbi lig
- ragbi yunion

Junior male athlete of the year

- *Jeffrey Bai
- *Numa Keneke
- *Nelson Stone

Spot

- athletics
- Judo
- Taekwondo

Junior female athlete of the year

- * Monica Jonathan
- *Liz Softball (Girls)

Spot

- Athletics
- Yachting

Junior team of the year

- *U22 Basketball Womens
- *U19 Softball (Girls)

Sports

- Basketbal
- Sofbal

Encouragement award outstanding team

- *AB Bears Softball (Womens)
- *Harlequins Rugby League Union
- *Kokopo Muruks

Sports

- Sofbal
- ragbi yunion
- ragbi lig

Encourage award outstanding female

- *Lucy Hore
- *Namiko Kobayashi

Spot

- Bowling
- Swimming

Sports person with a disability

- *Gabby Yura

Sports

- KickBoksing

Distinguish service to sports

- *Raymond Haoda
- *John Jambert
- *Kevin Murphy

Sports

- billiard & Snooker
- Judo
- ragbi lig

Coach of the year

- *Miri Areori
- *Philip Cridge
- *Stanley Tavul

Sports

- basketball
- athletics
- aussie ruls

Technical officials of the year


- *Sari Fareho
- *Peter Mikes

Sports

- ragbi lig
- basketbal



• Raymond Haoda.



• Sari Fareho

Bede askim long bel isi long taim bilong fainel

HENRY MORABANG i raitim

SEKRETARI bilong NCD Pablik Sevans Soka Bede Tomokita i mekim bikpela tok amamas i go long olgeta pilaia na opisel husat i stap insait long 1989/99 soka sisen.

Tomokita husat i holim wok sekretari nambawan taim i tok em i amamas bikos ol pablik sevans i kam bung long soka na wokim pren wantaim ol arapela pablik sevans.

Em i tok dispela yia i rogat wanpela

PSSA RIPOT

bikpela hevi long pait, kros na bagarapim ples i kam long ples pilai.

Tomokita i tok dispela wiken em fainel na em i askim olgeta pilaia, sapota na opisel long givim kain sapot ol i bin givim long stat bilong sisen i kam inap nau.

Em i mekim wanpela strongpela toktok na askim olsem fainel planti hevi i save kamap. Tasol long pablik sevans soka, dispela kain pasin i no gat na em i laik dispela pasin i mas noken kamap long fainel de.

Sekretari i askim tu long ol sapota long was long maus bilong ol. Em i askim ol klap opisel long tokim ol sapota long noken mekim ol toktok nogut long referi bikos em i wok bilong ol.

I tru referi i mekim rong, tasol dispela i no givim pawa long ol sapota o pilaia long kros wantaim referi.

Tomokita i tok sapos wanem klap o pilaia i no amamas long referi orait, ol i mas bihain rot long autim bel hevi. Na sapos ol pilaia i sakim tok em ol i sainim las kontrak wantaim pablik sevans soka kompetisen.

Osenia i askim long moa spes long Wol Kap

TOKTOK bilong moa tim long Osenia rijen i kik long Wol Kap em wanpela bikpela toktok tru i kamap long woksap bilong Osenia. Futbol Konfederesen long Nu Silan las wik.

Honarari presiden bilong PNGFA Peter Mommers husat i bin go stap long dispela woksap. Woksap ya em long paitim toktok long ol wok developmen bai kamap long rijen.

Bihain long miting, OFC i pasim tok pinis na presiden

OFC RIPOT

bilong OFC Charles Dempsey i go pinis long Zurich, hetkwata bilong FIFA long tromei dispela askim long FIFA.

Dempsey i laik traim grisim ol bikman bilong Yurop soka long salim sampelaspes bilong Wol Kap kwalifaia long arapela ol rijen - na Osenia tu i laikim sampela moa spes.

Nau yet Yurop i gat 14 spes na 15 spes i stap yet we ol bai pilai resis long painim husat tru bai stap long en.

South Amerika i gat 4 na namba faiv ples i op we Osenia i mas pilai wantaim lusa bilong ol long kwalifai.

Presiden bilong Osenia i tok olsem em i laik traim grisim Yurop long givim wanpela spes na sempion tim bilong Osenia i ken go pilai stret long Wol Kap na maski long pilaim ol kwalifaia gem.

Wina long Osenia rijen bai salensim tim long Saut Amerika long painim husat tru bai go pilai long 2002 Wol Kap long Japan na South Korea.



Dempsey yet i askim pinis presiden bilong FIFA Seph Blatter taim em i kam opim nupela soka koles long Nu Silan las mun.

Em i tok olsem em i no gat bilip long askim Yurop tasol em i ken traim long helpim Osenia.



• Nupela eksekutiv bilong PNG Football Asosiesen i holim namba wan miting bilong ol long Lae las wiken.

Ripot i tokaut olsem dispela miting em long stretim ol program bilong dispela yia.

WIKEN SPOTS EKSEN



WANTOK SPOT



Salens bilong maina primia bai pulim planti sapota

PSSA RIPOT

HENRY MORABANG i raitim

BIKPELA gem long Pablik Sevan Soka kik resis long Pot Mosbi em bai stap namel long ol tim i resis long winim maina primia taitel.

Long wimen divisen, Defence na Cellnet bai skelim strong long husat bai makim PSSA long nesanel klap sempionsip.

Defence i gat bikpela sans long winim dispela gem. Bikos long pri-sisen ol meri long Murray Bareks i wilwilim Cellnet 4-0.

Lapun mums Jean Norrie bai go pas long ol yangpela susa ya. Norrie em wanela bikmeri i save laik gutpela gem bilong soka, na sapos ol Cellnet i no was gut, umben bai pairap ya. Cellnet i save hangre stret long pilai long fainel. Olsem

nau ol i winim pinis namba wan spot. Sapos olgeta meri i kamap long trening long redim ol egens long Defence, ating ol bai win.

Ol meri Cellnet i save sik long les long trening na wanwan pilaia tasol i save kamap.

Kepten Pheobe Rarabun na biknem pilaia olsem Nellie Popeu na Frederica Siwin i mas toktok strong long pulim ol yangpela long trening. Elizabeth Cholai, Nia Matangiau na June Broome i mas wok bungwantaim sapos ol i gat tingting long soim stail long klap sempionsip.

Defence bai winim dispela gem.

Long gem bilong ol man, NPF na Police bai wanpela gutpela gem stret.

Police i gat sampela ol gutpela pilaia olsem Brian Tani, Justus Babo, Tamanabae, Amos Botty na Steven Mune.

Na long NPF, namba wan pren na brata bilong Mune, Hans Geman Gewampling i stap olsem straika. Mune

na Gewampling i save pilai long Yunivesiti klap na em i namba wan taim tupela bai salensim ol yet.

Dickson bai saptim Mune na ol arapela wan pilaia bilong tupela long beklain ya.

Na long ol arapela gem, fainel bilong PSSA i stat nau. Gem namel long namba foa na faiv ples bai kamap long painim aut husat bai gat seken sans. Wanem tim i lus em bai aut.

Na wina bilong namba tu na tri ples bai bungim namba wan tim long painim husat bai stap long gren fainel.

Wanem tim i lus long namba tu na tri bai i gat sans long salensim wina bilong namba foa na faiv.

Sekretari bilong PSSA Bede Tomokita i askim olgeta sapota long noken mekim ol tok i no stret long referi sapos ol referi i asua. Dispela kain pasin i no gutpela long ai bilong ol yangpela husat i laik pilai soka.

LAHI SOCCER ASSOCIATION

Pri-Season Draws
Igam Barracks Field
Saturday 13/03/99

0800 MA Sobou vs Defence 2
0950 MB TIC Bullets vs DAL Labu
1140 WA TIC Bullets vs Guria
1255 WB City United vs Defence
1410 MD Elcom vs Telikom
1600 MC Guria vs KA Midnorth

Sunday 14/03/99

0800 WB Waliya vs Murat
0915 Wa Elcom vs Bugandi
1030 MB Defence 1 vs Arnots
1220 MC Eastern Star 2 vs Murat
1410 MD Asiawe vs Malabu
1600 MA 8 Mile Demdem vs Malabu

Bye: MA: Bugandi

MC: Lae Biscuit

MB: Eastern Star 1

Key:

WB: Women Pool B MC: Men Pool C

WA: Women Pool A MB: Men Pool B

MD: Men Pool D MA: Men Pool A

Note: All player and spectators will pay a gate fee of K1.00

Kempen bilong PMSA ileksen i stat nau

PMSA RIPOT

WOK kempen bilong senisim eksekutiv bilong Pot Mosbi Soka Asosiesen i wok long kirapim paia stret namel long ol klap.

Ripot i kamap long Wantok Nius i soim olsem Dr Kuam Malai i gat bikpela saptim tru long winim bek posisen bilong en. Maski ol ripot nogut olsem PMSA i nogat mani, tasol nau wok Dr Malai i wokim long kamapim 5-ya developmen plen i senisim planti mani. Sekretari bilong PMSA William Vui i tokim olsem Dr Malai i gat planti sans. Planti man o klap i senisim tingting na i luk olsem presiden Dr Malai bai holim bek wok bilong em.

Vui i no laik bekim ol askim long toktok bilong i nogat mani, na askim Wantok long toktok wantaim Dr Malai na tresera Enoch Pokarup.

Arapela grup i gat tingting long rausim presiden Dr Malai i askim wanem klap husat i saptim tingting long senisim presiden long kamap long wanpela miting long apinun tude. Dispela miting bai kamap long opis bilong National Statistical Opis long Waigani. Miting ya bai stat long 4:30pm.

Toktok i kamap em long PMSA i no ran gut na ol i mas senisim eksekutiv bikos Dr Malai i no wok gut wantaim ol soka referi.

Insait long miting long Goroka, PNGFA mausman Paul Pondo i tokaut olsem em i no luksave long rebel referi bilong Dr Malai. Tasol em bai kam na stretim wanem hevi i kamap namel long PMSA na referi asosiesen long Pot Mosbi. Arapela toktok em planti klap i no amamas long ol kain ripot olsem PMSA i nogat mani.

I gat tripela klap i go pas long dispela miting we i laik lukim senis i mas kamap long PMSA. Ol klap ya em Defence, Momase na Cosmos.



• NPF husat i bin kamap manba wan long divisen wan bai bungim ol manba wan bilong divisen tu, Police long pilai long Nesanel klap sempionsip long dispela ya.

Sape winim sia bilong presiden

PNG NETBAL RIPOT

PNG Netbal Federesen i makim Janet Sape olsem presiden bihain long em i holim wok ekting inap wanpela ya olgeta.

Ol i makim Sape olsem presiden insait long anuel jenerel miting we i bin kamap long Pot Mosbi las wiken.

Ol arapela eksekutiv memba em Loi Vele em sinia vais presiden, Ani lamo em junia vais pres-

iden, Marion Genia em sekretari na Gima Kepi em tresera.

Genia em tu kepten bilong PNG nesanel netbal tim we bai pilai long SP Gems long Guam.

Ol selekta em Emily Taule (POM), Raka Launch (Sentral), Veitu Diro, (POM), Susan Aisi (POM) na Pole Kassman (POM).

Na junia selekta em lamo Launa (POM), Jill Laka (Lae), Helen Heni (Wewak), Salome Mavara (POM) na Walo Maha (Sentral).

Sape i tok olsem nupela eksekutiv bilong em bai makim developmen plen olsem namba samting.

Dispela developmen plen em bai traime long lukluk na saptim ol liklik senta husat i no save kisim gutpela saptim. Plen ya bai lukim ol wok olsem stretim ples pilai, ranim ol kosing na referi kos bilong ol referi.

Plantil ol senta i gat opisel tasol planti bilong ol i no save long pilai netbal o referim netbal.

Sape i tok wok edministresen i mas wok klostu klostu wantaim teknikel. Nau yet em i no laik mekim planti samting bikos em i laik mekim wanwan wok pastaim.

Arapela bikpela samting nau em long redim tim long go pilai long Saut Pasifik Gems long Guam na Wol sempionsip long Auckland, Nu Silan long Septemba.

Netbal Federesen i stretim nau toktok long kamapim bikpela fan resing long painim mani bilong dispela tupela ovasis trip. Olpela presiden Loi Vele bai go pas olsem siaman long fan resing.



• Pole Kassman.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.